

Bidestveanîna mafên neteweyî
yên gelê Kurd di çarçoveya
Îranek Demokratîk û Federalî de

Hejmar: 22
Augusta 2005
Biha: 150 Tûmen

agiri

Peyama Sekreterê Giştî yê
PDK Îranê di rê û resma
bîranîna 60 saliya
avakirina Partiyê de



Rûpela 5 -8

Rojnameyeke mehane ya siyasî û çandî

Partiya Demokrat ya Kurdistanê Îranê diweşîne

60 SAL XEBAT NE HINDIK E, LÊ JI BO AZADIYÊ NIRXEKÎ BIÇÛK

60'mîn salvegera avakirina Partiya Demokrat ya
Kurdistanê Îranê hate pîroz kirin

Rûpela 4



Daxuyaniya Komîteya Navendî ya PDK
Îranê derheq

Şêstemîn sala avakirina
Partiya Demokrat ya
Kurdistanê Îranê

Rûpela 2-4



Pîrozkirina cejna 25'ê Gelawêjê
li bajarên Kurdistanê Îranê


Bi boneya 25'ê Gelawêja îsal, 60'mîn
salvegera avakirina PDK Îranê, li piraniya
bajar û gundên Kurdistanê Îranê bi çêseke
germ û bêwêne ev cejna hate pîroz kirin.

Li Urmiyê, Selmasê, Şinoyê, Pîranşarê,
Serdeştê, Mehabadê, Rebetê, Bane,
Seqizê, Merîwanê, Kamyaranê, Dîwandere,
Sine, Kirmaşanê, Îlamê û gelek bajar û
cihên din karê propagandayê bi piştgirî ji
tevgera gelê Kurd li Kurdistanê Îranê bi
pêşengiya PDK Îranê hate meşandin.

Pîrozkirina cejna 25'ê Gelawêjê li
welatên derve

Herwiha li piraniya welatên derve, ji
aliyê Komîteyên çeleng yê PDK Îranê ya li
Amerîka, Kanada, welatên Ewropa û
Ustiraliyayê cejna 60 saliya avakirina PDK
Îranê bi çêseke germ hate lidarxistin.

Navenda 3'ê ya Kurdistanê jî roja 25'ê
Gelawêjê rê û resmeke hêja û berfireh
lidarxist û ew cejne hate pîroz kirin.



Nameya birêz
Mistefa Hicrî ji bo
Kofi Enan

Rûpela 9



Nameya birêz Mistefa
Hicrî ji bo Yekîtiya
Ewropayê

Rûpela 10



Daxuyanî:

Şêstemîn sala avakirina Partiya Demokrat ya Kurdistana Îranê

Hewwelatîyên birêz!

Xelkê xebatkar ê Kurdistanê!

Dost, alîgir û endamên Partiya Demokrat ya Kurdistana Îranê!

Roja 25'ê Gelawêja 1384'ê Rojî, rêkevtî 16.08.2005'ê Zayînî, şêst salên tewaw bi ser damezrandina Partiya Demokrat ya Kurdistana Îranê, Partiya pêşeng û xebatkar ya gelê Kurd di Kurdistana Îranê de derbaz dibe. Bi vê hincetê ve em pîrozbahiyên germ ji hemû endam, alîgir û dostên Partiyê, malbatên serbilind yê şehîdan, girtiyên siyasî yê berxweder û malbatên wan yê çavnihêr û tevahiya tex û qatên civaka Kurdewarî û hemû azadîxwazên Îranê dikin. Em ji bo xebatkarên rêya rizgarî û serbestiyê serkevtinê û ji bo hêvî û armancên niştimanî û neteweyî yê wan bidestveanîna herçiqas zû bi hêvî dixwazin.

Di 25'ê Gelawêja 1324(1945)'an de ji bo bersivdan bi hewcehiyên dîrokî yê qonaxa wê demê ya xebata rizgarîxwazane ya gelê Kurd, Partiya Demokrat ya Kurdistana Îranê li ser bingeha rêxistinî ya Komeleya Vejiyana Kurdistanê (J- K) hate ava kirin ku 3 salan berê bi mifah standin ji wê rewşa ku di encama şerê cihanî yê duyem de pêk hatibû, ava bibû. Avabûna Partiya Demokrat guhertineke dîrokî di tevgera rizgarîxwazane ya neteweya Kurd de bû. Bo cara yekemîn bû ku partiyeke neteweyî- Demokrat bi bername û destûreke siyasî û civakî ya pêşkevtinxwazane dihate nav meydana xebata xelkê Kurdistanê û tevî karwanê pir serfirazî ya xebatkarên rêya dadperwerî û demokrasiyê di herême de dibû parek ji xebata gelên cihanê dijî Faşîzm, Nazîsm, zor û zordariyê di hemû şewaz û çarçoveyan de.

Ji wê demê hetanî niha PDK Îranê alahilgirê xebata xelkê Kurdistana Îranê û yek ji hêzên sereke û xwedî hitbar yê nava tevgera rizgarîxwaz ya neteweya Kurd e. Ji bo vê partiyê di dîroka pir serfirazî ya tekoşîna xwe de gelek kosp û asteng û evraz û nişivên zaf hatine holê, tûşî têkşikan û tengasiyan bûye, rojên giran û dijwar ceribandine, bêguman tûşî şaşî û

kêmasiyan jî bûye, lê tu car bo rojek ji rojan ala xebatê bernedaye û di her qonaxekê de rêya jêhatî ji bo domandina rêbaza xwe peyda kiriye. Vê partiyê di jiyana xwe ya siyasî de serkevtinên mezin û berbiçav jî ji xwe re tomar kirine ku li sereweyî hemûyan de avakirina Komara Kurdistanê ye ku tenê 159 rojan piştî avabûna partiyê pêk hat.



Partiya Demokrat ne bi serkevtinan qude bûye û ne jî bi têkçûnan bê hêvî bûye. Ji sernekevtinên xwe wekî pirekê ber bi serkevtinên pitir mifah standiyê û ji serkevtinên xwe ceribîn bidestve anîne.

Biwêrî û netirsiya wê çendê hebûye şaşî û kêmasiyên xwe bibîne û îfde bi wan bike û hewl û xebatê ji bo serrastkirina wan bide. Ji vê rêyê ve vê partiyê kariye wekî partiyeke xwewdî pîrensîp xwe bi dost û dijminan bide nasandin û her ew taybetmendiyane û xisletane jî ev partiye kirine yek partiyên ceribî, biezmunîtirîn û heta pir dîroktirîn hêza siyasî ya nav tevgera mafxwazane ya neteweya Kurd.

Xebatkarên rêya rizgariyê!

Heke em bixwazin xuyatirîn xisletên PDK Îranê bibîr binin, em dikarin di nava dehan xislet û taybetmendiyên resen yê xebatkarane de, van xisletane wekî mînak bidin xuya kirin:

Ev partiye ji kûrahiya civaka Kurdewarî serî hildaye, ji bo qazanc û xizmetkirin bi xelkê Kurdistanê jiyaye û bizav kiriye û dirûşm û

armancên xwe ji xwestek û daxwazên wî xelkî bijartine. Her di wê demê de xwe bi tex û qateke taybetî ya civaka Kurdistanê ve girênedaye û hewil daye hêvî û armancên hemû çîn û texên gelî û demokratîk yê civaka Kurdewarî di bername û destûra xwe de bi cî bike. Her ji ber vê çendê ye jî ku hemû ev çîn û texane bidestveanîna daxwazên xwe di cî bi cîbûna bernameya siyasî ya vê Partiyê de dîtiye, ji ber vê çendê piraniya zaf ya wan di bin ala xebat û tekoşîna vê partiyê hev girtine. Partiya Demokrat, partiyeke rastbîn bûye. Dirûşmên xwe li gorî rewşa siyasî, civakî, rastiyan serdem û derdora xwe anîne rojevê û çî demekê hewil nedaye ku bala xelkê bo aliyê dirûşmên ne bi cî rabikişîne û hilgire. Lewre jî qet nebûye endam û alîgirên wê li ser nerastbûna dirûşmên wê jê veqetin û lê dûr bikevin. Ji bo selimandina vê gotinê ev çende bes e ku dirûşma stratêjîk ya PDK Îranê ku ji çareserkirina pîrsgirêka Kurd di çarçoveya Îranê de (çî bi awayê Otonomiyê yan Federaliyê) pêk tê, dirûşma piraniya herî zaf ya civatên xelkê û cihê pesend û pejiwandina hemû Kom û Komeleyên siyasî ye û derbazbûna 60 salan hîmên wê nelerizaniye.

Cihê baldanê ye ku Partiya Demokrat tevî bûna van dirûşmên stratêjîk jî, tu demekê ji vê çendê bê xeber nebûye ku bi xwe parek ji tevgera Kurd e û gelê Kurd li Îranê pişkek ji neteweya Kurd e û axa Kurdistana Îranê parek ji cih û warê bav û kalên neteweya Kurd e.

Partiya me bi tîgîhiştina hemû van rastiyan hewil daye her demekê him tevî hêzên siyasî yê opozîsyona Demokrat ya Îranê û him jî tevî hêzên siyasî yê xebatkarên nav tevgera Kurd baştirîn tîkiliyên hevaltîyê û alîkariyê ava bike. Bi wateyeke dinê Partiya Demokrat her di wê demê de ku Kurdistana Îranê bi meydana xebat û tekoşîna xwe ya siyasî hesibandiyê û maytêkirin di kar û barên çî parên din yê Kurdistanê nekiriye, bi bawer ve piştî daxwazên rewşa û berheq yê parçeyên dine Kurdistanê girtiye û tu derfetek bo piştgîrî ji xebatkarên wê beşane ji dest nedaye.

Xisletek xuya ya din ya PDK Îranê pêbendbûn bi serxwebûna siyasî û serxwebûna biryargirtinê ye. Partiyê bi mafê rewa û heta hewce yê xwe zanî ye ku tevî gelek ji partî, rêxistin, kom û komele û heya dewletan di dever û cîhanê de peywendiya siyasî û dîplomatîk bigre û li ser dîtin û nêrîn û heta berjewendiyên hevbeş bi wan re alîkariyê bike. Lê di çî dem û çaxekê de bi çî qîmetekê dest ji serxwebûna xwe ya siyasî ber nedaye û eva ku bûye bingeha rêbaz û biryarên siyasî ya vê partiyê tenê û tenê qazanc û berjewendiyên gelê Kurd û tevgera Kurd di Îranê de bûye ne tu tiştekî din. Li vir de bi şanazî û serbilindî ve em dikarin bibêjin zaf caran rê ketiye ku ji bo qazancên stratêjîk yê tevgera Kurd Partiya Demokrat dest ji hin destkevtên xwe yê demkî berdaye. Lê eva tu demekê tevî serxwebûna siyasî ya partiyê nateba nine û di rastî de eva jî parastina qazancên dom dirêj yê Partiyê bi qîmeta çavniqandin ji bidestxistiyên demkî û kurt dem e.

Amadebûn ji bo dayîna nirx û buhayên azadiyê yek ji xisletên xuya yê dine Partiya Demokrat e. Xebatkarên vê Partiyê evîndarên jiyane ne, ne evîndarê şehîdbûnê. Lê vê demê ku hewce ye di rêya jiyana serbilindaneya gel de kesek dest ji jiyana xwe ya taybetî ber bide, xebatkarên demokrat ji cangorîkirin û fidakariyê tirsekê nabene ber dilê xwe.

Mêzeyî karwanê şehîdên vê partiyê bikin, di nav dehan hezar dost û tagirên partiyê de, hezaran endam û sedan kadroyên xebatkar û dehan endamên Rêberiyê û li serweyî tevan ve em ser karwanê şehîdan **Qazî Mihemed** û serdarê şehîd yê navdarê Kurd **Dr. Qasimlo** û xebatkarê mandînenas wekî **Dr. Şerefkendî** dibînin.

Hemû ev xisletane û zaf taybetmendiyên şoreşvanî yê din hitbareke xasmanî ji bo PDK Îranê çê kirine. Şêst sal e ev partiye rêxuyaker, rêber, Partiya xweştivî û cihê hêviya civatên xelkê Kurdistanê Îranê ye. Him dijmin û him neyarên Partiyê gelek hewil dane ku ji hitbar û nifûza vê Partiyê kêmkirin. Lê hemû ev hewl û bizavane bi ne serkevtinê re rû bi rû bûne. Em piştrast in hetanî çaxekê ku xebatkarên vê Partiyê bi pîrensîpên wê wefadar bibin, ev dê her wekî berê cihê hitbara piraniya zaf ya xelkê Kurdistanê bibe.

Partiya Demokrat ya Kurdistanê Îranê û rêxistinên siyasî yê Îranî û di nava xelkê parçeyên din yê Kurdistanê û partiyên wan yê siyasî de û di nava kom û komeleyên siyasî yê deverê û navneteweyî de jî hitbar û nav û dengeke xuya û berçav heye û ew hemû ji wê wekî Partiyê berpirsiyar, şoreşger, rastbîn û bi pîrensîp nas dikin û rêz û rûmeta wê digrin. Em dikarin bi aşkira bibêjin ku Partiya Demokrat di hemû van warane de di refa pêşîn ya hêzên siyasîye Îranî û Kurdistanî de ye ku cihê dilxweşî û şanazyê ye.

Hogirên azadî, demokrasiyê û dadperweriyê!

Partiya Demokrat ya Kurdistanê Îranê di rewşeke nû û hêvîdar de cejna 60'în salvegera avakirina xwe pîroz dike ku di deverê de guhertinên berbiçav û mezîndar derketine holê. Pirojeya **Rojhilata Navîn ya Mezin** bi îbtikara Dewletên Yekbûyî yê Amerîkayê û piştgirîya welatan û hêzên mezîndar dirûsmên pêşvebirina demokrasiyê, parastina mafên mirovan, geşandina aborî, dijberî tevî rejîmên dîktator, bidestveanîna mafên jinan û ji holê rakirina terorîzmê bilind kirine. Di hundirê Îranê de tev perdeyên xapandinê û fend û fêlên li ser rûçikê desthilata hakim hatine rakirin û kakil û naveroka wê ya kevneperestane wekî heye yê ketiye ber çavê hemûyan. Civatên xelkê Îranê hemû gumanek derbarê guhertina Komara Îslamî di hundir de danîne qiraxê û aşkira û bêperde di fikra vê çendê de ne ku hikûmetekî gelî û demokratîk di cihê Komara Îslamî de damezrînin. Bi keyfxweşî ve xelkê Kurdistanê ku tu demekê hember rejîma desthilatdar tûşî gumanê nebûne û ji destpêka avabûnê ve rêya xwe ji rejîmê veqetandine, serhildaneke berfireh bi pêşwaziya cejna 60 saliya avakirina Partiya xwe ya xweştivî çûn. Eva pênc heftî ye Kurdistanê Îranê bûye meydana rikeberiya ronahî û tarîtiyê, heq û neheqiyê, azadîxwaz û dîktator û gel û dijminên gel. Xelkê Kurdistanê Îranê di van 5 heftiyane de bala hemû hogirên azadiyê û dadperweriyê ji bo aliyê xwe rakîsandine û cihan bi vê çenda ku li Îranê û bi taybet di Kurdistanê de derbas dibe, hesandine.

Tevgera Kurd di hemû parçeyên


Kurdistanê de gavên mezîndar ber bi nasandina daxwazên xwe yê berheq bi dunyayê avêtine, di Turkiyê û Sûriyê de ku hetanî çend salan berî niha nav birin ji Kurd û tevgera Kurd bi tawan û guneh dihate hesabandin, desthilatbidestên van welatane neçar bûn her nebe rastiya bûna Kurd û tevgera heqxwazane ya wî neteweyî bipejirînin.

Li Îraqê tevgera Kurd di encama dehan sal xebat, xwe gorîkirin û mifah standina zîrekane û bi dem ya serokatiya tevgera Kurd di rewşa piştî şerê kendavê û hiloşîna rejîma Sedam Husên de, yê bûye yek ji parematrên bibandor yê meydana siyasî ya Îraqê ku di asta herêma û navneteweyî jî de hesabeke taybetî li ser tê kirin û ber bi vê çendê diçe ku ew maf û azadiyên di pazdeh salên çûyî de jî bo Kurdê ve para Kurdistanê hatine bidestxistin bi yekcarî cîgir bike û di qanûna bingehîn ya welat û kom û komeleyên navneteweyî de bi fermî bihê naskirin.

Dîktatorên li derdora me yan hatine hilweşandin yan rojên temenê wan ketiye jimartinê. Bayê azadiyê ku ji mêjdem e dest pê bûye, mijûl e dibe bi bahozek ku text û bextê hemû zordaran bi xwe re dibe û têk dişikîne. Di Rewşeke wiha de rejîmên kevn û kevneperest bi piştgirî ji diyardeya mirar û qirêj ya terorê û alîkarî kirina terorîzma cîhanî dixwazin çend rojan temenê desthilata teji tawan û hovîtiya xwe dirêj bikin. Aşkîra ye ku di rewşeke wiha de hemû hêzên siyasî yê pêşkevtinxwaz ku çepera jêhatî ya xwe, çepera berevrû bûn tevî terorê, terorîst û terorîstperweran xurt bikin heya ku şansê dawiyê yê man di desthilata dijî geliyane û yek ji wan Komara Îslamî bistînin.

Hewwelatîyên rêzdar!

Em gelek baş dizanin ku civatên xelkê Kurdistanê û seranserî Îranê çî çavnihêriyek ji PDK Îranê hene û di rewşa niha de çî erk û wezîfeyên giran û girîng dikeve ser milê vê partiyê. Em baş haydar in ku rewşa hundir, herêma û navneteweyî herçiqas jî amade be, hemû neteweyek, hemû tevgerêk û hemû hêzeke siyasî bi vê qasê dikare bidestxistiyên lê bibe ku di hewl û xebata guhertin û guherandinê de bandora xwe dike. Lewre Komîteya Navendî ya PDK Îranê di boneya pîroz ya şêstemî salvegera avakirina partiyê de, ji civatên xelkê Kurdistanê re sozê bide ku:



- Bi hemû şiyar û karîna xwe ji bo bihêzkirina refên PDK Îranê bixebite, rewşeke jêhatîtir amade bike ku ev partiya ji hemû heyîn, îmkanatên xwe û ji şiyana kit kite xebatkarên xwe mifahê bistîne. Eva mezintirîn garantî ye ji bo berbipêşdeçûna Partiya me û rêya tenê ya beşdariya bibandor di vê pêvajoya serbilindî afirandinê ye ku di welatê me û devera me de dest pê kiriye û çavnihêriya pêşdeçûnê jê tê kirin.

- Peywendiya xwe tevî civatên xelkê Kurdistanê û van serhildanên berfireh ku çend heftî ye dest pê kiriye, xurtir bike. Çiqas bihê kirin, pitir jê nêzîk be, bandorê li ser bike û bandorê jê werbigre. Divêt karek bihê kirin wekî gelek derfetên din yên dîroka gelê Kurd, ji hev cuda kirina Partiya Demokrat û xelkê Kurdistanê ji bo dost û dijmin kareke dijwar be.

- Hindî îmkan hebe em alîkariya xwe bi hêzên siyasî yên meydana xebata Kurdistanê Îranê xurtir bikin û li ser aliyê kêrnameyê hevpar ji bo xebat di rêya hiloşandina rejîmê de û ji bo bernamerêtina rojên piştî guherîna rejîmê rê bikevin. Nabe em rê bidin dudestekî û dijberiya di nava hêzên siyasî de bibe valahiyek ku dijminên azadiyê ji rêya wê bihêne tevgera rizgarîxwazane û li hundir de vala û di wateya xwe de betal û bê kakil bikin.

- Her di vê demê de em hewlê bidin peywendiyên alîkarî û hevxeberiyê tevî neteweyên Îranê û hêzên seranserî yên Îranê xurt bikin. Bernameya hevbeş ji bo xebat û organizasyonê di navbera parên tevgera şoreşger ya xelkê Îranê de pêk bînin û li ser xetên giştî yên sîstema hikûmetî ya piştî hiloşîna Komara Îslamî bigihîjin encamê. Di vî warî de divêt ji bo bihêzkirin û berfirehkirina **Kongireya Neteweyên Îrana Federal** girîngiyeke taybet bihê dayîn.

- Divêt em peywendiyên xwe tevî aliyên beşdar di tevgera Kurd de xurtir bikin, bi taybet piştigiriya tevgera pir serbilind ya Kurdistanê Îraqê bikin û ji ceribîna binirx û serkevtî yên wê dersê werbigrin. Aşkîra ye ku tevgera rizgarîxwaz ya neteweya Kurd her çiqas par par, ji hev hatibe veqetandin, xalên hevpar û berjewendiyên hevbeş zaf in û divêt ji hemûyan mifaha hewce bihê standin.

- Aqibet divêt em têkiliyên xwe yên siyasî û dîplomasiyê tevî derve çende çê bibe, berfirehtir bikin. Em hewlê bidin dengê heqxwaziya gelê Kurd û tev gelên Îranê bi cîhanê bigihîjin û hindî çê bibe dost û piştevanan peyda bikin. Cihê me di çerçevê xebatê ji bo azadiyê, wekhevîyê û xebatê dijî zordarî, kêvneperestî û terorîzmê de ye û divêt me roleke berbiçav di vê meydana de hebe heta ku em bidestxistinê berçav ji bo gelê xwe misoger bikin.

Silav ji biranîna 60 saliya avabûna PDK Îranê

Silav ji giyanê Pêşewa Qazî Mihemed, avakerê PDK Îranê

Silav ji giyanê şehîdên rêya rizgariyê û li serweyiwan Qazî, Qasimlo û Şerefkendî

Silav ji girtiyên siyasî

Silav ji civatên xelkê Kurdistanê

Bihêrîna rejîma Komara Îslamî


Bijî Partiya Demokrat ya Kurdistanê Îranê

Komîteya Nawendî ya Partiya Demokrat ya Kurdistanê Îranê

25.05. 1384

16.08.2005

60'mîn salvegera avakirina Partiya Demokrat ya Kurdistanê Îranê hate pîroz kirin



Êvîriya roja sêşem 16'ê Tabaxa 2005'an hemberî 25'ê Gelawêja 1384'ê Rojî, bi beşdariya Sekreterê Giştî yê PDK Îranê, birêz Mistefa Hicrî, Endamên Deftera Siyasî, Komîteya Nevendî, şandeke Partiya Sosyalîst ya Kurdistanê Turkiyê, Kadro û Pêşmergeyên Partiyê û gelek dost û alîgirên PDK Îranê rê û resmeke hêja û berfireh bi boneya 60'mîn salvegera avabûna PDK Îranê hate lidarxistin.

Rê û resm bi sirûda **EY DEMOKRAT** dest pê bû. Piştî Payama rêzdar Mistefa Hicrî, Sekreterê Giştî yê PDK Îranê hate pêşkêş kirin. Naveroka peyama Kekê Mistefa Hicrî gelek dewlemend û balkêş bû. Mirov dikare bibêje ku gotara wî dîrokî bû. Deqa Peyama Kekê Mistefa Hicrî di hejmara 22 ya Rojnameya **Agirî** dê bihê weşandin.

Peyamên Partiya Yekîtiya Demokrat ya Kurd li Sûriyê, Partiya Sosyalîst ya Kurdistanê Turkiyê, Peyamên Yekîtiya Ciwanên Demokrat ya Kurdistanê Îranê û Yekîtiya Jinên Demokrat ya Kurdistanê Îranê û çend rêxistin û sazîyên Kurdistanê Îraqê hatin pêşkêş kirin.

Helbesteke dewlemend ji aliyê Xatûna **Nahîd Husênî** ku taze ji bajarê Seqîza Kurdistanê Îranê hatiye Kurdistanê Îraqê û tevî cejna pîrozkirinê 60 saliya PDK Îranê bibû, hate xwendin.

Berdewam nûçeyên pîrozkirina cejna 25'ê Gelavêjê, 60'mîn salvegera avabûna PDK Îranê li bajarên Kurdistanê Îranê ji aliyên pêşkêşkarên rê û resmê dihat xwendin.

Tevî vê çendê ku rayedarên Komara Îslamî ya Îranê piştî serhildana gelê Kurd li Kurdistanê Îranê ku mehek dibe dest pê bûye û niha jî her berdewam e, rewşa awarte û hikûmeta leşkerî li Kurdistanê Îranê hatibû ragihandibûn û hemû gir û çiyayên bajarên Kurdistanê Îranê hisar dabûn ku agirê cejna 25'ê Gelavêjê nehê hilkirin û cejn nehê pîroz kirin. Lê wan nekarîna pêşiya gelê Kurd bigirin û wan cejan 25'ê Gelavêjê û agirê cejnê bi serekvtin û serfirazî hilda.

Gelek sirûd û stranên Kurdî hatin pêşkêş kirin. Komara Çandî û Hunerî ya keçên Kampa Romadiyê ku niha li herêma Kelar û Xaneqîn ya Kurdistanê Îraqê dijîn bi stran û govenda Kurdî rê û resm pitir xemilandibûn.

Rê û resma pîrozkirina Cejna 25'ê Gelavêjê, 60'mîn salvegera avabûna Partiyê bi dîlan û govenda Kurdî ya beşdaran bi awayekî berfireh û bi çêşeke gelek mezin dawî pê hat.

Peyama Sekreterê Giştî yê PDK Îranê di rê û resma bîranîna 60 saliya avakirina Partiyê de

Xelkê hişyar û azadîxwaz yê Kurdistanê!

Malbatên serbilind yên şehîdan û girtiyên berxweder yên siyasî!

Endam û aligirên fidakar û şoreşvan yên Partiya me!


Kadro û Pêşmergeyên çavnetirs û xebatkar yên gel û Partiyê!

Îro 25'ê Gelawêja sala 1384'ê Rojî (16.08.2005), Partiya Demokrat ya Kurdistanê Îranê, Partiya xweştevî ya civatên xelkê Kurdistanê, Partiya Pêşewa Qazî Mihemed, Dr. Qasimlo, Dr. Şerefkendî û Partiya hezaran şehîdên sorxelat yên neteweya me, bi serbilindî ve 60'mîn xetîra temenê teji serfirazî ya xwe hil dîke û di bin ronahiya wê xetîra geş û birisqî da, karwanê tevgera neteweyî-demokratîk ya Kurdistanê Îranê ber bi bilindahiya hêviyê û ji bo bidestveanîna armancên me yên mezin dixê rêyê. Bi vê hincetê ve ez ji aliyê rêberiya partiya me ya xebatkar pîrozbahiyên germ pêşkêşî we dikim û bi hêviya rojên geş û cejneke mezintir.

Em di demekê de bîranîna 60'mîn sala avakirina partiya xwe ya xebatkar dikin ku gelê me yê mafxwaz di Kurdistanê Îranê de, ketiye ber bêrehmanetirîn awayên lêdan û serkuta sedsalên navîn ji aliyê rejîmekî Faşîstî ya desthilatdar bi ser Îranê de. Lê hevdem tevî wê kul û kovanê de, em xwe bi serfiraz dîzanin ku niha jî û piştî derbasbûna 6 dehsalan bi ser xebata bêrawestan ya partiya me, gavên me ji bo meşandina rêya xebatê xurtir û gelê me hişyartir û asoya serekvtinê geştir e.

Hevalên rêzdar, xelkê mafxwaz û azadîxwaz yê Kurdistanê!

Partiya Demokrat ya Kurdistanê Îranê di roja 25'ê Gelawêja 1324'ê Rojî (16.08.1945), li ser bingehên rêxistinî yên **Komeleya Vejdandina Kurd** û bi merema kanalîzekirin û piraktîzekirin xebatê ji bo bidestveanîna mafên berheq yên gelê Kurd di Kurdistanê Îranê de hate ava kirin û ji wê demê were heta îro komek bidestxistiyên binirx û hêja ji bo bizava demokrasîxwaziya Îranê bi giştî û nemaze ji bo gelê bindest û mafxwaz yê Kurd di Kurdistanê Îranê de bi diyarî aniye. Bi bîr û fikra ronahî ya Pêşewayê Partiyê û destên bihêz yên PDK Îranê, heyameke kurt piştî



avakirina vê partiya xebatkar de, **Komara Demokratîk ya Kurdistanê** hate ava kirin û li gor wî serdemî û di hemû devera Rojhilata Navîn de, karekî mezin bû. Pîrensîpên vê Komarê bi awayeke wisa demokratîk bûn ku heya niha jî pareke neveqetiyayî ji armancên bilind yên xelkê Kurdistanê û partiya avaker ya Komara Kurdistanê ne. Eger çî temenê vê Komara canemerg kêmîtir ji salekê bû, lê niha navê mezin û nîrxên wê yên demokratîk wekî stêrk di dîroka xebata demokrasîxwazane ya gelên Rojhilata Navîn de dibiriqin.

Dijminê dilreş yên gelê me wisan dîzanî ku bi birîna serê Komarê û fetisandina Serok Komarê Kurdistanê, dê xwîna şoreş û berxwedanê di şademarên partiyê û gel de hişk dibe û cendekeke sar, bêhêz û bêvîn di şûnda bicî dimîne. Salên piştî ji holê rakirina Komara Kurdistanê, bi sedema natebahiya hevkeşeyên siyasî yên navneteweyî û herêmi tevî xwestek û daxwazên demokratîk yên gel de, yek ji qonaxên dijwar yên dîroka teji asteng û kosp ya tevgera me ya mafxwaz bû.

Di wê qonaxê de rewşa dijwar ya hundir di Îranê û herême de perdeyekî lawaz û bêdeng bi ser partiya me de kişandibû û kêm mabû toyê bê hêvîtiyê di dilê gelê me de bihê çandin. Lê çeqmaqa tivinga Pêşmergeyên cihên hêviya

vê partiyê di sala 1364 (1968)'an de careke din pif kire agirdanka şoreşê û careke din ev agirê pîroz hate geşandin. Bi vî awayî dawî bi vê qonaxa tarî hat û perdeya bêdengiyê hate şikandin û di hemû Îranê û deverê de deng veda. Rejîma Paşatiyê kete lerizînê û kenîya hêviyê bo ser lêv û dilên têniyê geşbûnê vegeyîya. Her çend nîşandana termê dabêj dabêj kirî yê pehlewî û mîrxasên afirînerên wî şarî û tevgerê ji aliyê rejîma Paşatiyê li bajarên Kurdistanê bi armanca çavtirsandin û kuştina hêviya dawiyê ya xelkê bû, lê rast berevajî vê, vejandineke nû bû ku şiyar, hêz û wêrek da gelê me û wekî ew beyta helbesta ku di Farsî da heye xuya kir ku **ev rêle ji pilingan vala û betal nebûye**. Silav ji canê wan koma şehîdên serbilind ku bi gorîkirina jiyana xwe, hêvî dane gel.

Derketina kesatiya bilind û xebatkar ya Dr. Qasimlo, yek ji wan hêzan bû ku di wê qonaxê de jiyaneke nû da partiyê. Lewra nabe bas ji dîroka partiyê û heta dîroka bizava demokrasîxwaziya Rojhilata Navîn bihê kirin û rêberê zana Dr. Ebdulrehman Qasimlo di bilindtirîn elenda mafxwazî û demokrasîxwaziyê de wekî çiyayekê nesekinî be. Teybetmendiyên qahîm û bilind yên Qasimloyê rêber bûne sedema vê çendê ku di roja 22'ê Pûşpera sala 1368'an da (1989) ev mirovê aştxwaz kete ber êrişa guleya xedr û hov ya dîplomat-terorîstên Komara Îslamî ya Îranê û li ser maseya bi nav gotobêjê de jiyana pir ji serfirazî ya xwe ji dest da.

Dibêjin mirina mirovê mezin bi xwe rabûn û ji dayîkbûneke dinê ye, eva jî di pêwendî tevî koça Qasimloyê rêber de bi aşkira hate xuya kirin û bîr û ramanên Qasimlo bû bi rêbaza hertimî ya PDK Îranê û dirûşma dijmin bezandinê ya **Qasimlo, Qasimlo rêya te dirêjî heye**, piştî derbasbûna 16 salan bûye dirûşma sereke ya xelkê emegdar û azadîxwaz yê bajar û gundên Kurdistanê.

Her çend ku terora Dr. Qasimlo birîneke Kûr xiste cendeke tevgera me ya berheq, lê Qasimloyê zana kesek nebû ku qedera partiyê bispêre qeza û qederê, her ji ber vê çendê di heyamê jiyana teji jî serbilindahiya xwe de şagirdên wisan elimandin ku bikarin

berpirsiyariya rêberkirina xebatê bidestve bigirin. Her lewra piştî şehîdbûna Dr. Qasimlo, şagirdê biemeg û rastbêj yê rêbaza Qasimlo, Dr. Seîd Şerefendî, bi kêrhatîbûn û micidiyeke kêr wêne, pêşiya karwanê xebatê girte stûyê xwe û nehêla **bê Qasimloyî** di rûçik û rûyê gel û partiye de xuya bibe.

Çekçekûleyên Tehranê, demekê ku ji bo wan rohn û aşkera bû Dr. Seîd micidane û mandînenasane rêberiya partiye û tevgera neteweyî-demokratîk ya Kurdistanê dike û hêvî û hêzê dibexşîne civatên xelkê Kurdistanê, çend terorîstên dilreş şandine Almanyayê û di pîlan û kiryareke nemirovane de tevî çend xebatkarên din şehîd kir.

Paş şehîdkirina Dr. Seîd, bi keyfxweşî ve şagirdên rêbaza Qasimlo-Şerefendî nehêlan ala rêberên mezin yên gel û partiye bikeve erdê û bi karê bikom û giştî û ji xwe borîneke şorişvanî, rêbaza şehîdên gel û partiye domandin û derfet ji rejîma kurdkuj ya Komara Îslamî re nedan ku

gelê me tûşî bêhêvîtiyê bike.

Hevalên hêja, xelkê mafxwaz yê Kurdistanê!

Niha ku 6 dehsal bi ser xebata mafxwazane ya partiya me



re derbas bûye, çaxekê ku em lênihêrinê ji paşerojê didin û mêzeyî qonaxên dijwar yên xebata partiya me ya tekoşer dikin, ev pîrsa di hizra me de derdikeve holê: çawa Partiya Demokrat ya Kurdistanê Îranê kariye wan qonaxên giran û dijwar bi serkevtin ve bimeşîne? Çawa berxwedan kiriye û tûşî têkçûn û herifinan nebûye û bi serbilindî ve yê bûye partiya xweştewî û berdilê civatên xelkê Kurdistanê?

Renge em bikarin çend sebebên ji bo li ser pê rawestana partiya me destnîşan bikin, lê bi raya min em dikarin sedemên sereke yên vê berxwedaniyê di van çend hêlan de kurt bikin:

- A: Partiya Demokrat, partiya serdemiyane û nûjen**
- B: Rastdîtina siyasî ya PDK Îranê**
- C: Demokrasiya navxwe û raman û nêrinên mirovhezane yên Partiya Demokrat**

Partiya Demokrat, Partiya serdemiyane û nûjen

PDK Îranê bê lêre û wêde di nav rastiyeke siyasî û civakî de bejin girtiye ku pêk tê ji **hebûna stem û zulma sistematîk ya neteweyî di Kurdistanê Îranê de**. Bi vî awayî, PDK Îranê di bingeh de partiyekî neteweyî ye û armanca sereke ya vê partiye bezandina qonaxa rizgariya neteweyî ye di pêxema avakirina jiyana û sistemekî siyasî ku kêrhatiyê mirov û neteweya vî serdemî be.

Ji wir pêde bo me rohn û aşkira dibe ku PDK Îranê, partiya takekes, girûp yan çinekî taybetî ya civakî nîne, belkî ev partiya xebatkar, partiya hemû çîn û texên civakî yên Kurdistanê û wan tevan di nava refên xwe de kom dike û ji bo xebateke bêrawestiyana û demokratîk rêk dixê. Ji ber vê, PDK Îranê, Partiyekî nûjen û serdemiyane ye û ji hemû metod û awayên hozî û kevneperestane dûr e.

Neteweyîbûna PDK Îranê ne bi wê wateyê ye ku ev partiya ji metodên nasyonalîstiya berçavteng peyrewiyê dike, belkî partiya me partiyekî neteweyî ye ku li ser komek bingehên fikrî û demokratîk sekiniye, bi awayekê ku di xwendîngeha vê Partiya Demokrat de, rêz û hurmet ji tev gelan re tê girtin û mafê biryardana qedera hemû gelên cîhan heq tê zanîn û di kiryar da ji bo avakirina cîhanekê gavan davêje ku ji hemû terzên çewsandin û perçiqandina regezi, ayînî û çînayetiye dûr be. Ji vê hêlê ve, PDK Îranê ji du aliyan ve bi partiyekê nûjen û serdemiyane tê hesibandin: yanî, him di warê teorî û him di warê piratîk de. Girîngtirîn û sereketirîn bingehên teorîk yên Partiya Demokrat pêk tê ji: Demokrasi, Peloralîzma olî û kulturî, Omanîzma, sekolarîzma, bawerî bi çareserkirina pîrsgirêkan ji rêya aştîyane ve, bawerî bi mafên gerdûnî yên mirov, wekheviya gelan di mafê siyasî de, wekheviya jin û mêran di civakê û cihê kar kirinê da, ret û mandelkirina terorîzmê û parastina hurmeta mirov di dijwartirîn



qonaxên xebatê de.

PDK Îranê ev mijarane wekî dirûşmên bêbingeh yên siyasî û bi merema xapandina xelkê ne hilgirtiye,

belkî baweriyeke kûr bi van mijarane heye û di kiryarê de ji wan peyrewî kiriye û ev rastiya ji bo dost û dijmin ji rohn bûye. Organîze kirin û hevgirtina bingehên teorîk yên PDK Îranê tevî piratîkên wê partiye de, bûye sedema jêhelçûna nifûz û pîrestîja partiye di nav civatên xelkê Kurdistanê de, û çendîn sal e ku ev partiya ku bûye partiya xweştewî û berdilê hemû çîn û texên civaka Kurdistanê. Girêdayî bûna partiye bi wan pîrensîpên demokratîk di asta deverê û navneteweyî de jî, hitbareke kêrhatî ji bo Partiya Demokrat desteber kiriye. Li wir em dikarin îşarê bi çend nimûneyên nûjenî û serdemiyane yên partiye bikin: Damezrandina Komara Demokratîk ya Kurdistanê Îranê, pêkanîna Yekîtiya Jinên Demokratîk ya Kurdistanê Îranê û Yekîtiya Ciwanên Demokratîk ya Kurdistanê Îranê, di çaxekê de ku di civakê de pûte û girîngiyeke wisan bi van texane nehatiye dayîn. Mehkûmkirina dagîrkirina Balyozxaneya Amerîka ji aliyê Xwandekarên Peyrewê Rêya Îmam ve, pêşwazî ji dawî pêhatina şerê malwêranker yê Îranê û Îraqê, parastina berjewendiyên mezin yên neteweya Kurd di her çar parçeyên Kurdistanê de û retkirina partîtiya demargirjane, hewildan ji bo pêkanîna pilatformeke demokratîk di navbera partiyên Kurdistanê û partiyên seranserî yên Îranê, parastina ceribînên binirx yên Hikûmeta Herêma Kurdistanê Îraqê, rol û bandora berbiçav ya partiye di pêkanîna **Kongireya Neteweyîna Îrana Federal** de, pêşwazî kirin ji pîrosesa demokratîzasyonê di Rojhilata Navîn û pirojeya Rojhilata Navîn ya Mezin û çendîn û çend mînakên nûjen û serdemiyane yên din.

Rastdîtina siyasî ya Partiya Demokrat ya Kurdistanê Îranê

PKD Îranê ji ber vê çendê ku partiyekî şoreşger e û li ser vê baweriyê ye ku pêkhatiya siyasî-civakî ya Îranê û Kurdistanê tevî jiyana û sistema rêxistinî ya serdemiyane û nûjen de natebahiya, armanca vê partiyê herifandina vê sistema paşverû di rêya avakirina jiyaneke kêrhatî û sistemeke û teba tevî serdem û mafên xwezayî û bingehîn yên mirovan de ye, bi vî halî jî PDK Îranê bawerî bi "Miyanerewiya" siyasî heye, û ew "miyanerewî" ya siyasî jî ji rastdîtina siyasî ya wê partiya xebatkar ve çavkanî digire. PDK Îranê çî demekê xebat nekiriye ku teoriyên siyasî û civakî bi ser rastiya siyasî û civakî de bisepîne, belkî ev partiye di pêvajoya xebata piratikî de gihîştîye teoriya siyasî û civakî û ew teoriyane jî ji bo xizmet bi civakê pêşkêşî rastiya civakî kiriye. Ev pirosêsa bi awayekî karzanane peya kiriye, bi terzekê ku nebûye sedema hilweşandina bingehên hewce yên civakê û di heman demê de jî civaka Kurdistanê li ser bingeha hişyariya civakî û siyasî ve pêş xistiye. Ev rasdîtina siyasî ya partiyê, renga di demeke Kurt de bibîte sedema barîna rexne û gazindeyan jî aliyê dost û dijminan ve, lê berbipêşdeçûna **Demê** rastî û dirustiya helwêstên PDK Îranê ji hemûyan re aşkira kiriye û bûye sedema jêhelçûna asta hitbara civatên xelkê Kurdistanê bi partiya wan ya xebatkar re.

PKD Îranê bi dirêjahiya 6 dehsal ji temenê teji şanazî û serbilindî yê xwe, dirûşm û sozê bi xelkê Kurdistanê nedaye ku jê re nehê çî bi çî kirin û gelek pitir ji dirûşm û sozên xwe, xizmet bi doza berheq ya neteweya Kurd bi giştî û bi taybetî gelê Kurd li Kurdistanê Îranê kiriye. Eva jî vedigere bo baweriyê kûr ya rêberên berê û niha yên partiyê bi xelkê Kurdistanê û fêmkirina vê rastiya haşalênêkirî ku xelkê Kurdistanê stûna piştî PDK Îranê ye û PDK Îranê jî gevriya bang û hawara mafxwaziya civatên xelkê Kurdistanê ye.

Demokrasiya navxwe û raman û nêrinên mirovhezane yên Partiya Demokrat

Mamostayê demokrasiyê, şehîdê hertim nemir Dr. Ebdulrehman Qasimlo derheq demkrasiyê dibêje: "Ewa ku ji bo partiya me, hemû wextekê ji tevan girîngtir e, çî di hundirê partiyê de û çî li derveyî partiyê de, xebat ji bo demokrasiyê ye. Divêt ev xebate berdewam û bêrawestiyên bihê kirin. Xebat ji bo demokrasiyê tu demekê nabe biçê bin siya xebat ji bo mafên neteweyî yan xebata tex û çînatiyê. Ji ber ku ewa sedema pêk hatina Partiya Demokrat e, heta ku Partiya Demokrat maye, demokrasi merem û armanca wê ye".

Her çend, PDK Îranê partiyekî neteweyî ye û stema neteweyî di pêkhatina vê partiya çeleng de haydarê sereke bûye, lê hevdem, demokrasi yek ji wan bingeh û kolekeyên sereke bûye ku her di destpêkê de ew partiye li ser hatiye avakirin. Yanî, PDK Îranê tenê partiyekî neteweyî nine ku armanca wê tenê rizgariya neteweyî be, bê vê çendê ku sistemeke rêxistinî ya jiyana civakî destnîşan bike. Ji vê dîtingehê ve, PDK Îranê, partiyekî neteweyî ye ku armanca sereke ya wê partiyê çigirkirina qonaxa rizgariya nîştimanî di rêya damezrandina sistemeke siyasî-civakî ya wisan de ye, ku tê da rêzê ji buhaya hebûna mirov ku azadî ye bigre. Azadî nirx û armançek e ku tenê di sistema demokratîk de rê ji bo pêşveçûn û berfirehbûna wê xweş dibe. Ku wisan e em dikarin bibêjin ku demokrasi û rêzgirtin ji mafên mirovan û parastina wan mafane, felsefeya pêkhatina Partiya Demokrat e û demokrasi bûye yek ji parametirên bingehîn yên nasnameya PDK Îranê.

Di PDK Îranê de, azadiya ra derbirinê û dîtin û nêrinên

siyasî bi tevahî hatiye çigir kirin û her endameke partiyê dikare li ser her pirseke siyasî, dîtin û nêrinên xwe bide xuya kirin, bi vî mercî ku kesayetiya takekesan biparêze û bikare nêrinên xwe bi piştgirêdan bi belgeya rast û dirust bide selimandin. Çigirbûna demokrasiya navxweyî bûye sedema vê çendê ku PDK Îranê heta niha serkevtiyane 13 kongireyan lidar bixe û di nav kongireyan de rê ji bo dest bi dest kirina desthilatê xweş biket. Her çend ku 60 sal bi ser temenê teji serfiraziya partiyê derbas bûye, lê PDK Îranê partiyekî bihêz, afirîner û loçên pîrbûnê û kaliyê neketiye rûmeta wê. Sedema xurtbûna wan hêzên bingehdar di nav PDK Îranê de bo vê çendê vedigere ku di nav sistema Partiya Demokrat de, rê ji nû bûn û dest bi dest kirina desthilatê nehatiye girtin, ew nebûne jî alîkarê partiyê bûye ji bo xwe rêxistin tevî pêvajoya serdem de û organîzekirina bernameyên partiyê tevî hevarîşeyên siyasî yên nû ên deverê û çîhanê!

Hevalên hêja, endamên xebatkar yên partiyê û xelkê mafxwaz yên Kurdistanê!

Em di demekê de bîranîna 60'mîn salvegera avakirina partiya xwe ya çeleng dikin û bi vê boneya pîroz ve cejnê digirin, ku pirosêsa çîhanbûna siyasî û aboriyê hemû deverên çîhanê girtiye û hevarîşeyên siyasî guhartineke mezin bi xwe ve girtiye û encamên dawîhatina şerê sar gihîştîye dilê Rojhilata Navîn. Babelîska xurt ya demokratîzasyonê bûye sedema ji holê rabûna du rejîmên dîktator ya Talibana Efxanistanê û rejîma Bees ya Îraqê û bi keyfxweşî ve gelê Kurd di Kurdistanê Îraqê de, kariye parek ji mafên xwe yên neteweyî bidest bixe û xebat ji bo bidestxistina mafên din yê gelê Kurd didome. Di parên din yên Kurdistanê de jî, tekoşerên Kurd xebat ji bo bidestveanîna mafên rewşa û zevtkirî yên neteweya Kurd xurt kirine.

26 sal bi ser temenê teji ji tawan, çewsandin û terorê yê rejîma dîktator ya Komara Îslamî ya Îranê derbas bûye û di binav hilbijartina wê rejîmê de, Ehmedînejad ku derdikeve yek ji gelalêrêjên terora rêberê me yê mezin Dr. Qasimlo bûye, rola sereke di çagîrkirina Balyozxaneyê Dewletên Yekbûyî yên Amerîkayê li Tehranê de û rehîngirtina karmendên wê Balyozxaneyê hebûye, niha yê bûye Serok Komarê ve rejîmê. Kirîz û pirsgrîkên hundir, herêmî û navxweyî yên rejîma azadîkuj heta asteke berçav kûr bûne û Komara Îslamî ber bi roja nemanê ketiye rêyê. Hemû ev guhartinên mezin di kongireya 13'an ya PDK Îranê de, ku nêzik salekê berî niha pêk hat hatine rojevê û bi keyfxweşî ve, rêberiya hilbijartî ya Kongireya 13'an li ser xwe rêxistin û organîzekirin tevî pêvajoya nû tekezê dikin. Ev guhartinên mezin û kûr yên hevarîşeyên siyasî yên devera Rojhilata Navîn û çîhanê, komek wezîfe û berpirsiyariyên nû dixê ser milê rêberiya PDK Îranê û civatên mafxwaz yên Kurdistanê. Erkê rêberiya PDK Îranê ye ku fikir ji şewaz û awayên nû bike û sistema nû ya xebatê darêje hetanî gelê me bi hêviyên dêrin yên neteweyî û demokratîk yên xwe bigihîje. Hewce ye, civatên mafxwaz yê Kurdistanê têkiliyên xwe bi PDK Îranê re gelek pitir ji caran zêdetir bikin û bîr û fikrê ji awayên nû yên xebata gelî û medenî bikin.

Hevalên hêja, civatên biwêr û mafxwaz yên Kurdistanê!

Her wekî em hemû agehdar in, di roja 18'ê Pûşpera îsal de, piştî şehîdkirina ciwanekî Mehebadî bi navê **Şiwane** û sivikatî bi termê wî, xelkê azadîxwaz yê

bajarê Mehabadê rijiyane ser rê û şeqaman û ji rejîmê xwastin ku bikuj û îşkencekerên vê tawan û guneha hov û nemirovane bihêne dadgehî kirin û bi sizayê rewa yê xwe bigihîjin. Lê rejîma Kurduj ya Komara Îslamî li cihê guhpêdan bi daxwazên berheq yên xelkê, bi serkût û tund û tûjiyê bersîv da. Dîrokê selimandiye ku serkut û tund û tûjî nikare pirsgirêkan çareser bike, belkî roj bo rojê kûrtir dike. Xelkê bajarê Mehabadê piştî vê bûyerê û di roja 22'ê Pûşperê, salroja şehîdbûna serokê xwe Dr. Qasimlo, bi hinceta vê bîranînê û xuyakirina nefret û bêzariya xwe ji kuştina şehîd Şiwane dukan û bazarên xwe daxistin û nerazîbûn û bêzariya xwe ji rejîma terorîstperwer ya Komara Îslamî ya Îranê nîşan dan û selimandin ku piştî derbasbûna 16 salan ne tenê cinayeta şehîdkirina Dr. Qasimlo nehatiye ji bîr kirin, belkî ew navê mezin û bilind rênîşanderê mafxwazî, şores û berxwedanê ye. Piştê hêdî hêdî piraniya bajarên bi lidarxistina meş û xwepêşandanên mezin yên gelî û daxistina bazarên, dengê mafxwaziya xwe bi guhê hemû gelên cîhanê gehand û ji bo tevan ev rastiye rohn û aşkira bû ku serbarê serkûta sistematîk ya 26 saliya Komara Îslamî, gelê Kurd li Kurdistanê Îranê bi tevahî ji maf û azadiyên xwe nasyar e û di vê rêyê de amadeyî her cure fidakarî, cangorîkirin û tekoşinekê ye.

Mixabin di wan rêze meşên gelî de, sedan kes ji xortên biemeg yên gel bi guleya şevperestên Komara Îslamî ya Îranê şehîd û birîndar bûn û hejmareke berçave din ji ciwan û xebatkarên gel rapêçî girtîgehên reş û tarî yên Komara Îslamî ya Îranê hatine kirin.

Ev serhildana dawiyê, bi mezintirîn, birnaveroztirîn û

gelitirîn xwepêşandanên xelkê Kurdistanê piştî avakirina Komara Îslamî ya Îranê tê hesibandin û ceribîneke binirx ji bo hewil û gavên pêştir yên gelê mafxwazê Kurdistanê ye. Lewra hewce ye, gelê me û partiya me xalên jar û lawaz yên vê serhildanê destnîşan bikin û xalên wê yê bihêz jî xurtir bikin û ceribînen binirx jê werbigirin. Li wir ez bi pêwîst dizanim serê rêzê ji bo hemû wan xebatkarane bitevînim ku bi awayekê di wê berxwedana qehremanane de rol hebûye. Li ser navê PDK Îranê ve jî em behî û serxweşiya xwe pêşkêşî malbatên serbilind yên şehîdên wan xwenîşandan dîkin û xwe di kul, xem û kovana ji destdana xortên wan de şirik û beşdar dizanin û daxwazê ji xelkê Kurdistanê û hemû azadîxwazên Îranê û cîhanê dîkin ku ji bo azadkirina girtiyên qehreman yên wan xwepêşandanane ji her cure hewl û xebatekê kêmasiyê nekin.

Di vê boneya pîroz de, li ser navê tev rêberiya partiye û gişt endam û xebatkarên PDK Îranê ve, em serê rêz û hurmetê ji bo hemû şehîdên sorxelat yên gel û partiye û xêzan û malbatên serfiraz yên şehîdan û girtiyên berxweder yên siyasî û hemû ew mirovên dilsoz û welatparêz ku ji bo demekê jî be, di rêya armancên bilind yên PDK Îranê de xebat kirine, ditevînin. Em wan hemûyan piştrast dîkin ku PDK Îranê ew ji bîr nekirine û partiya me ya tekoşer bi we sax e û dijî û hûn xwediye rastîn yên PDK Îranê ne.

Hezar silav ji malbatên serbilinde şehîdan û girtiyên siyasî!

Silav ji endam û tagirên xebatkar yên partiya me!
Silav ji xelkê mafxwaz yê Kurdistanê!

Silav ji 25'ê Gelawêjê, salroja avakirina Partiya Demokrat ya Kurdistanê Îranê!

Serkeve xebata gelê me bi rêberiya PDK Îranê!
Mirin û neman ji bo rejîma sedsalên navîn û terorîstperwer ya Komara Îslamî ya Îranê!

Daxuyaniya Deftera Siyasî ya Partiya Demokrat ya Kurdistanê Îranê derheq rewşa girtiyên xwepêşandanên vê dawiyê yên bajarên Kurdistanê



**Hevwelatîyên birêz!
Xelkê xebatkar yê Kurdistanê!**


Piştî nerazîbûn û xwepêşandanên rêzokî yên xelkê bajarên Kurdistanê di heyamê nêzik bi heyvek û nîva

çûyî de, rejîma Komara Îslamî di cihê bersîvdan bi nerazîbûna xelkê Kurdistanê û giringî û buhadan bi daxwaziyên wan, wekî siyaseteke hertimî ya xwe dest bi serkut û qirkirina bêrehmane ya gel kir û di encama wan tepeserkirinan de, dehan kes hatine kuştin û bi sedan kes birîndar û hatine girtin.

Girtî bi tawan û guneha beşdarîkirin di xwepêşandanên aştîyane de ji aliyê hêzên Întizamî û Îtîlaat (Sîxor)ê ve bi tundtirîn awayan ketine ber azar û îşkenceyan. Di nav girtiyên de em kesên wekî Xatûna Dr. Roya Tilûî, çalakvana mafê Jinan li Kurdistanê, Seîd Saidî, Îclal Qewamî, Madîh Ehmedî û Azad Zemanî yên rojnamevan dibînin. Seîd Saidî û Îclal Qewamî ji roja 22'ê Gelawêjê hemberî 13.08.2005'an bi nîşana nerazîbûn ji girtin û îşkenceya girtiyên dest bi gireva birçîbûnê kirine. Kesên navhatî bi tundtirîn awayan di bin îşkenceya cendekî û ruhî de ne û di rewşeke nebaş de dijîn û jiyana wan di xeter û tirsê de ye.

Em tevî mehkûmkirina kiryarên dijî mirovî yên rejîmê, daxwazê ji hemû kom û komeleyên mirovhez, rêxistinên parastina mafên mirovan, Erûya Navneteweyî û hemû rêxistinên siyasî û mirovdost dîkin ku ji bo rizgariya girtiyên siyasî bi giştî û Dr. Roya Tilûî, Seîd Saidî, Îclal Qewamî, Madîh Ehmedî û Azad Zemanî bi taybetî hewl û xebatê bidin û zext û givaşê bixine ser rejîma Komara Îslamî û dengê nerazîbûna xwe di vê derheqê de bilind bikin. Berevanî kirin ji wan girtiyên siyasî, berevanî ji mafê mirovan û berevanî ji azadî û demokrasîyê ye.

Deftera Siyasî ya Partiya Demokrat ya Kurdistanê Îranê
22.08.2005
31.05.1384



Nameya Sekreterê Giştî yê PDK Îranê, birêz Mistefa Hicrî ji bo Kofî Enan



Birêz Kofî Enan, Sekreterê Giştî yê Rêxistina Neteweyên Yekbûyî

Ez bi hewce dizanim te haydar bikim ku di heyamê heyva çûyî de xelkê bajarên Kurdistanê Îranê bi hinceta 16'mîn salvegera terora Dr. Qasimlo ku di 13.07.1989'an de li Viyênê bi destê terorîstên Komara Îslamî hate teror kirin û her wiha hilibijartina Mehmûd Ehmedînejad wekî yek ji sebebkarên wê terorê bi Serok Komariya rejîmê, rêze meş û xwepêşandaneke nerazîbûnê yên aştiyane lidarxist. Mixabin ew meşên nerazîbûnê yên aştiyane û aram li hemû bajarên Kurdistanê ji aliyê dezgehên Îtîlaat (Sîxor û Ajanê) û hêzên leşkerî yên Komara Îslamî ve bi xwînê hate gevizandin û tevî serkutkan gelek tund û bêrehmane ya wan rû bi rû bûn û bi dehan kes ji xwepêşander bi teqandina guleyên çekên rejîmê hatine kuştin ku hetanî niha cenazeyê çend kes ji wan bi van navane hatine nasîn:

1.Seyîd Kemal Esferam, 2.Omer Bayezîdî, 3.Bayezîd Merûfî, 4.Cemîle Xizrî, 5.Hekîme Sor, 6.Luqman Nesrulayî, 7.Mihemed Şerîetî, 8.Ebas Remezani, 9.Husên Remezani, 10.Ferzad Mihemedî, 11.Şadman Mihemedî, 12.Husên Ebdî.

Her wiha pitir ji 300 kes jî birîndar bûne û hejmarek ji wan jî hatine girtin û rapêçî girtîgehê hatine kirin û di bin îşkenceya tund û bêrehmane ya celadên rejîmê de ne û bi qeder û çarenivîseke ne xuya re rû bi rû hatine kirin, bi awayekê ku hetanî niha 4 kes ji girtiyên bajarê Mehabadê di bin îşkenceya de jiyana xwe ji dest dane û termên wan bi malbatên wan hatine dayîn.

Niha hemû bajarên Kurda yên Îranê di 4 Parêzgehên Azerbaycana Rojava, Kurdistan, Kirmaşan û Îlamê de bi tevahî hatine **Mîlîtarîze** kirin û **Rewşa Awarte** û **Hikûmeta Leşkerî** tê de dimeşe. Hêzên rejîmê ji şewitandin û agirberdana dukan û bazarên bajaran dest ber nadin û zîyan û xisarên zaf bi xelkê gihandine. Birîndar di nexweşxaneyan de bê çareseriyê nojdarî ji hêla hêzên rejîmê ve ji îşkencegehan re tînin birin û piraniya birîndaran jî ji ber vê çendê ku nekevîne destê hêzên rejîmê di Penaga û malan de xwe diveşêrin û dimînin û destê wan bi bijîşk, derman û îmkanatên nojdariyê nagihîje. Her civîneke 3 kesî û her hatin û çûneke xelkê qedexeyê û tenahiya canî û malî ya xelkê yê ketiyê ber tirs û xetera micid.

Di vê derheqê de bêdengiya kom û komeleyên navneteweyî yên alîgirên mafên mirovan, ji bo gelê Kurdistanê ciyê heyrîmanê ye. Her çend hetanî niha pitir ji 20 caran Komara Îslamî ya Îranê ji aliyê Komîsyona Mafên Mirovan ya Rêxistina Neteweyên Yekbûyî ve bi sedema bînpêkirina mafên mirovan, hatiye mehkûm kirin, lê rejîmê tu car guhartinek bi qazancê demokrasîyê û parastina mafên mirovan, di riftar û kiryarên xwe de pêk ne aniye ku eva jî ne tenê nabe bibe sedema bêdengî û bêalîbûna Rêxistina

Neteweyên Yekbûyî û Komîsyona Mafên Mirovan ya vê rêxistinê, belkî divêt wan ji bo rû bi rû bûn tevî vê rejîmê hay bide. Çunkî bêdengî li hember riftara dijî mirovane ya Komara Îslamî a Îranê, vê rejîmê ji bo domandina cinayet û bînpêkirina mafên mirovan, pitir hay dide û destê wê vekirîtir dike.

Gelê Kurd li Kurdistanê Îranê bi rêberiya Partiya Demokrat ya Kurdistanê Îranê ji mêj dem e ku dijî hikûmetên dîktator yên zal û desthilatdar bi ser Îranê de ji bo cigirkirina demokrasîyê û bîdestveanîna mafên neteweyî yên gelên Îranê di çarçoveya Îranekî demokratîk û Federal de xebatê dimeşîne, lewra heq nine ev gelê azadîxwaz, ku bi tawana azadîxwaziyê bûye goriyê terorîzma Komara Îslamî û bi awayekî bê rehmane tê serkut û qirkirin, ji ber çavan wînda bibe.

Em daxwazê dikin ku seba bûyerên heyva çûyî di Kurdistanê Îranê de hûn gavên bilez bavêjin û aliyê kêmhewl û bizav bihê dayîn:

- 1.Şandekê ser bi Komîsyona Mafên Mirovan ya Rêxistina Neteweyên Yekbûyî seredana Îranê û Kurdistanê bike û ji nêzîk ve ji çawaniya bûyeran vekole.
- 2.Zext û givaşê bixin ser rejîma Komara Îslamî ya Îranê ku girtiyên meşên nerazîbûnê yên vê dawiyê yên bajarên Kurdistanê serbest bihên berdan.
- 3.Derfet û delîve ji bo wan kesên ku bi sebebê teqandian guleyên hêzên rejîmê birîndar bûne, pêk bihê hetanî ku bêtirs ji girtin û îşkencekirinê seredana nexweşxaneyê bikin û çareseriyê birînen wan bihête kirin.
- 4.Ji çawaniya kuştina wan kesên ku piştî girtin û îşkencekirinê di girtîgehê de jiyana xwe ji dest dane vekolîn bihête kirin.

Evana renga kêmtirîn çavnehîriyê bibin ku gelê azadîxwaz û aşîxwaz yê Kurd ji we yê rêzdar û ji Komîsyona Mafên Mirovan ya Rêxistina Neteweyên Yekbûyî hene. Em hêvîdar û li benda gavên we yên bicî û bilez in, vê hêviyê di dilê xortên gelê Kurd wekî gelekî demorasîxwaz, aşîxwaz, dijî terorîzmê û pêgirtiyê qanûn, isûl û biryarên pesendkiriyên mirovî yên Rêxistina Neteweyên Yekbûyî bihêz û xurt bike ku azadîxwaz, demokrasîxwaz û alîgirên mafên mirovan, li hember dîktatorî, terorîzm û desthilatên ne tebah tevî ruha serdem de bi tenê namînin.

Em li benda hewl û xebatên we yên birêz in
Rûnivîs ji bo / Komîsyona Mafên Mirovan ya Rêxistina Neteweyên Yekbûyî
Spas û hurmet

Sekreterê Giştî yê Partiya Demokrat ya Kurdistanê Îranê
Mistefa Hicrî
06.08.2005
15.05.1384

Nameya Sekreterê Giştî yê PDK Îranê, birêz Mistefa Hicrî ji bo Yekîtiya Ewropayê



Roja 13.07.2005'an, roja terorkirina Dr. Ebdulrehamn Qasimlo, Sekreterê Giştî yê Partiya Demokrat ya Kurdistanê Îranê û hevalên wî li bajarê Viyen, serbajarê Otrîşê di sala 1989'an de ye. Di vê rojê de Dr. Qasimlo ku bi navê gotûbêj bi armanca çareserkirina pirsgerêka Kurd li Kurdistanê Îranê ji aliyê rejîmê ve hatibû vexwendin, bi destê terorîstên Komara Îslamî her li ser maseya gotûbêjê hate teror kirin.

Xelkê bajarê Mehabadê bi merema rêzgirtin ji bîranîna Dr. Qasimlo di 16'mîn salvegera terorkirina wî rêberê Kurd û xuyakirina nerazîbûna xwe ji rejîma Komara Îslamî bi hinceta vê kiriyara terorîstî û her wiha hîlbijartian Mehmed Ehmedînejad - ku di terora Dr. Qasimlo de dest hebûye - bi Serok Komariya Îranê û bi holê anîna daxwazên xwe yê siyasî di vê rojê de, tevî domandin bi xuyakirina bêzariya xwe ji kuştina ciwanekî Mehabadî bi navê Şiwane piştî îşkencekirineke zaf di roja 18.07.2005'an, dukan û bazarên xwe girêdan û meşeke aştiyane dest pê kirin. Lê hêzên rejîmê bi awayekî bêrehmane êrîş kirin ser xelkê û hejmareke berçav ji wan birîndar kirin û dehan kes ji wan jî zîndanî kirin û di girtîgehê de îşkenceyê zaf hatine kirin ku di encamê de 4 kes ji wan di bin îşkenceyê de jiyana xwe ji dest dane û çend roj piştê termên wan bi malbatên wan re hate dayîn.

Xelkê bajarên din yê Kurdistanê jî ji bo xuyakirina nerazîbûnê derheq ve riftara dijî mirovahiyê bi meş û girevgirtinan piştgiriya xwe ji xelkê bajarê Mehabadê nîşan dan.

Bi vî awayî niha nêzîk mehekê ye ku xelkê bajarên Kurdistanê ketine

bin serkut, zext û givaşên Komara Îslamî ya Îranê. Di vî heyamî de nêzîk bi 20 kes ji xelkê hatine kuştin û bi dehan kes birîndar bûne ku birîna hin ji wan gelek dijwar û giran e, bi sedan kes jî hatine girtin û ji girtîgehê re hatine şandin û di bin îşkenceya tund û tûj de ne û xisar û ziyaneke zaf ya malî ji xelkê ketiye.

Gelê Kurd li Kurdistanê Îranê li benda vê çendê bûn ku welatên demokrat û alîgirên mafên mirovan li Ewropa lênihêrinekê ji vî xelkê belengaz bikin ku di vî serdemî de bi tawan û guneha daxwaza destpêkîrîn mafên xwe di meşa aştiyane de, wiha bêrehmane dikevîne ber êrîşa hêz û aliyên hikûmeteke dîktator û can û malê wan tê de biçê û hemû rojekê îşkence û kuştina evladên xwe dibînin.

Em bawer in siyaseta bédengiya Ewropa derheq bi wan hemû cinayetên Komara Îslamî derheq gelê Kurd û gelên din yê Îranê siyasetek e ku tevî pîrensîpên demokratîk nateba û cuda ye û em dixwazin bala we ji bo wan xalane rabikêşin ku encama vê siyasetê wekî 25 salên derbasbûyî ne tenê berdevambûna Komara Îslamî ji serkut u tepeseriya xelkê azadîxwaz yê Îranê lêdikeve, heta ev siyaseta nikare alîkariya bidestveanîna berjewendiyên bazirganiyê û armancên we di berevanîkirina Îranê ji projektên çekên Etomî jî be.

Lewra em daxwazê ji we dikin serbarê mijûlbûna we bi projektên Etomî yê Îranê û gotûbêj û danûstandin tevî vê rejîmê:

1. Şandeke xwedî desthilat ji bo Kurdistanê bişînin bo lêkolînkirin li ser wan cinayetên rejîmê û çawaniya riftara wan tevî girtiyên xwepêşandanên ve meha dawiyê.

2. Komara Îslamî ya Îranê bi hinceta bînpêkirina destpêkîrîn mafên mirovê Kurd mehkûm bikin.

3. Daxwazê ji Îranê bikin di zûtirîn dem de girtiyên wan bûyerane serbest berde û ziyana xisar malî ya xelkê bideteve.

4. Bi micidî daxwazê ji Komara Îslamî bikin ku bikujî îşkencekarên vî xelkî di dadgehekî adilane de bi zêrevaniya nûnerên Yekîtiya Ewropayê bihêne mehkeme kirin.

Sekreterê Giştî yê Partiya Demokrat ya Kurdistanê Îranê

Mistefa Hicrî

06.08.2005

15.05.1384

Daxuyaniya Nûçeyî

Di roja 22.05.1384'ê Rojî, hemberî 13.08.2005'an de, ciwanekî xelkê bajarê Seqizê bi navê **Riza Fethî** kurê Muhsin ku di xwepêşandana bajarê Seqizê de, li roja 12.05.1384'an de birêve çû, ji aliyê hêzên Întizamî ve hatibû birîndar kirin, di mala xwe de digirin û tevî xwe ji bo ciheke nediyar dibin. Di şeva 24.05.1384'an hemberî 15.08.2005'an de meytê wî davêjine ber derê mala wan, di halekê de ku devê wî teji penbû kiribûn û cihê xendiqandinê li ser stûyê wî xuya bû. Em tevî mehkûmkirina ve cinayetê û behî û serexweşi ji malbata wî, ji kom û komelên mirovdost daxwazê dikin ku ve cinayetê mehkûm û şermezar bikin.

Komîteya Ragihandinê ya PDK Îranê

31.05.1384

22.08.2005

Daxuyaniya Nûçeyî

Ciwanekî bajarê Bane bi navê Şefî Suheylyayî, kurê Mela Hamid Siyawme ku di xwenîşandaneke bajarê Sine de ji aliyê hêzên Întizamî ve hatibû girtin û heta heyamekê malbata wî ji qedera wî nehaydar bûn, şeva 01.06.1384 (23.05.2005)'an de ji aliyê Îtîlaata bajarê Banê hatin haydar kirin ku bihên û meytê kurê xwe werbigirin. Lê ji ber wê ku ji meytê par par kirî yê kurê wan, wêneyan negirin, bi zor malbata wî neçar kirin ku her wê şevê meytê kurê xwe di gundê Siyawmê de veşêrin.

Em tevî mehkûmkirina wê cinayetê û behî û serexweşi kirin ji malbata wî şehîdî, ji bo careke din daxwazê ji hemû kom û komeleyên mirovdost, rojnamevan û rawêşbîran dikin li hember ve cinayeta rejîmê ku em dizanin cinayeta wan ya dawiyê jî nabe, bédeng nebin.

Komîteya Ragihandinê ya Partiya Demokrat ya Kurdistanê Îranê

25.08.2005

03.06.1384

Elî Kaşîfpûr (1957-1990) nayê ji bîr kirin


Ebdula Hicab

Roja 16'ê Tebaxê, 24'ê Gelavêjê 15. salvegera şehîd bûna heval û hevxebatê nemir, Elî Kaşîfpûr e. Têkoşerê mezin Elî Kaşîfpûr, çî li dema xebata Pêşmergeyatiyê, çî li dema ku endamê Komîteya Navendî ya Partiya Demokrat ya Kurdistanê Îranê û çî li wê dema ku berpirsiyarê yekem yê partiyê li hemû herêma Bakûrê Rojhilata Kurdistanê her tim di rêza yekemîn ya xebat û tehlîkeyên li ser rêya têkoşîna azadiya Kurdistanê de bû. Lewra Eliyê têkoşer li her derî û di her rewşê de armanca yekemîn yê hêzên tarîtiyê, terorîstên Komara Îslamî bû. Derfeta ku di meha Tebaxa 1990'an li bajarê Konya li Turkiyê ketî destê mirovkujên hov de, destê Eliyê azadîxwaz ji malbat û gel veqetand û şîn xiste ser rûye pir ji hêviyê "Şetîla" ya rûken û "Aram"ê sawa yê bendiya rêya bab.

Eliyê dilsoz û dilxwazê gel, ji wê roja ku xwe naskir heta dema ku xwe di rêya gel de bext kir, her tim rêya azadiya gel şopand, ji bo serbestiya têkoşîn kir û jîna kurt lê bi kêr ya xwe xiste xizmeta doza gelê xwe. Lewra gelê Kurd li Bakûrê Rojhilata Kurdistanê, dilxwazên azadiyê û malbat û hevbîrên Elî, her tim nav û bîranîna Elî berz û pîroz diparêzin.

Komara Îslamî bi terorkirina Elî Kaşîfpûr, xebatkarek bi nîrx ji refên têkoşîna Kurdistanê stand, lê nekarî û nikare hêviya azadiyê ji gel bistîne. Bi xwîna ale Elî û şoreşgerên mîna wî re dara hêviya Kurd pitir pel girtin û reh dakuta û niha ber bi hindê ve diçe ku hemû Kurdistan bike baxê newjiyana Rojhilata Navîn a nû.

Îro di 15. salvegera şehîdbûna Elî Kaşîfpûr de seranserî welatê wî bûye hêvî û serhildan. Niha baxê ku Elî û Eliyan bi xwîna xwe av dayî, bi xwîna Şiwane Seyîd Qadirî û şehîdên Seqîza bi xwîn ya sertaca serhildanê têr av dibe. Li demekê de ku xelkê Soma û Urmiyê bi nav û bîranîna Eliyan tene meydanan, li Sine, Pîranşar, Mehabad, Serdeşt, Bokan, Bane, Merîwan, Dîwandere, Îlam û Kirmaşanan gel ala xebtata ku Elî û hevbîrên wî yên nemir hildanî girtin destê xwe û ber bi armanca Elî ve dimeşin. Li Başûr roja serkevtinê hil daye, li her



Şehîd Elî Kaşîfpûr

deverek Bakûr têkoşîn û hêvî heye û li Başûrê Rojava gel bi yekdengî bûye mertalê parastina nasnameya xwe.

Di 15. salvegera şehîdbûna Kekê Elî de, rêvîngên rêya wî ji hemû alî, partiyên siyasî û rêxistinên Rojhilata Kurdistanê daxwaz dikin ji bo ku armanca şehîdan bi cî binin, destê yekîtiyê û hevxebatiyê bidin hev. Li serî de Partiya ku Elî hemû jiyana xwe tê de kar kirî û nava refên wê de şehîd bûyî, Partiya Demokrat ya Kurdistanê Îranê û di gel wê jî hemû pêşengên xebata me di Rojhilatê welat de pêwîste rojek ji ya din zûtir li dewra pilatformek hevbeş ya neteweyî kom bibin. Banga gelê me hevgirtin e, hêviya me hevgirtin e û tinê rêya serkevtinê jî her hevgirtin e.

Ji bo bîranîna Elî, hemû şehîdên têkoşîna Kurdistanê û bi taybet şehîdên serhildana wê dawiyê em hemû bi hev re banga hevgirtinê bilind bikin.

Esmânê hêviya Kurd wê ber bi vedanê ve diçe, tîrêjên roja azadiyê wê gul û şîlanên ser mezarê şehîdan vegeşîne û her der û deverê Kurdistanê bike peykera bîranîna şehîdan.

Bîranîna şehîd Elî û hemû şehîdan pîroz be

Bijî yekîtiyê û hevgirtin

Daxuyaniya Çapemeniyê Paris 04.08.2005

Dukan û bazarên bajarê Pawe hatin daxistin

Hêzekî zaf ya rejîmê ji Kirmaşanê û bajarên derdor ber bi Pawe hatine şandin

Du hilokopterên rejîmê ku mijûlê zêrevanîkirina bajar in, amade ne êrîşê bikin ser xelkê

Li gorî nûçeyekê ku her niha gihîştîye Bîroya Nûneriya PDK Îranê li derveyî welat, sibêdeya îro pîncşemî 04.08.2005'an dukan û bazarên bajarê Pawe bo piştgirî ji serhildana xelkê bajarên Seqîzê, Sine, Mehabad û bajarên din yên Kurdistanê û ji bo şermezarkirina kiryarên hov û cinayetkarane yên rejîmê dijî xelkê Kurdistanê, bi tevahî hatine daxistin.

Rejîm ji tirsê serhildana xelkê û ji bo piştgirî ji xwepêşandanana wan, hêzekî teyar û zaf ji bajarên Kirmaşanê û bajarên derdor ber bi bajarê Pawe anîne. Du Hilokopterên rejîmê bo zêrevanîkirina kiryarên cinayetkarane di halê geriyan li ser bajarê Pawe ne.

13 şehîd û 200 birîndar ji bajarê Seqîzê

Li gorî nûçeyên dawiyê, aliyê kêm 13 kes ji xelkê Seqîza serhildayî bi sedema teqelêkirina cinayetkarên Komara Îslamî şehîd û pitir ji 200 kes birîndar bûne. Hejmareke zaf ji xelkê vî bajarî hatine girtin û binçavkirin ku li gorî nûçeyan di dema lêpîrsînê de ew hatine îşkence kirin û bêhurmetî jî bi wan hatiye kirin.


Partiya Demokrat ya Kurdistanê Îranê serbarê mehkûm û şermezarkirina cinayetên Komara Îslamî dijî gelê Kurd li Kurdistanê Îranê, ji gişt rêxistin û partiyên azadîxwaz li sernaserî cîhanê û nemaze komele û sazîyên berevanî ji mafên mirovan û civaka navneteweyî dixwaze, ku li hember kuştin û serkutkirinên rejîmê bêdeng nerûnên û bi piştevanî ji xwestekên demokratîk yên xelkê rabin û çî din rê nedin Komara Îslamî kiryarên xwe yên cinayetkarane dijî xelkê zulmlêkirî yê Kurd bimeşîne.

Partiya Demokrat ya Kurdistanê Îranê
Bîroya Nûneriya Derveyî Welat

Jin, Îslam û Demokrasî di Rojhilata Navîn de

Berhevkirin: Fadiye Fakir
W: Hiwa

Nezma nû ya cîhanî û pirs aştîya bê demokrasî di gelek welatên Rojhilata Navîn de pêdviyeke zor bi nûbûn guherandin di nav wan welatan de, bûye egera vê yekê ku gelek rexnegir û rewşenbîr pêtir li ser hikûmeta van welatane bifikirin û li ser van welatane dîtînen xwe bidine diyar kirin.



Pêkanîna

guhertînen civakî dikarê welatên Rojhilata Navîn di nava dinyaya nûjen û pêşketî de beşdar biket. Pêkanîna van guhertinan û ya cîgirkirina demokrasîyê pêwîstî bi destnîşankirina du xalan e: **Yek**, rewşa Jinan. **Du**, Vejandina ala Îslamê. Her core reformek hevceyî vê hindê ye ku pirsgirêkan bibe astekî ramiyarî û herweha dibe navenda arîşe û kêşeyê vejandina Îslamî. Guhertîna rewşa jinan di civakan de û li berçavgirtina zulm û zorên ku hegera berfirehbûna wan ku pir girîng e, şertê sereke yê avedankirina vê civakê ye ku hurmeta mafên mirovan, serbestiya bingehîn û demokrasîyê biparêze. Serbestiya jinan û demokrasî li bi hev re nizîk in û her du daxwazên hevpişk wek serbestî(medenî û takekesî)ya mafên mirov, rastî, şerafet, tibatî, serxwebûn, parvekirina desthilatê, azadiya peloralîzmê dişopînin. Daxwaza afirandina xwîndina Femînîstî ji dîrokê bang biket. Serbestiya partiyan û gelên ku kêmtir di nav qada siyasî de başdar in, encama azadiya jinan e.

Renge nebûna demokrasîyê hevpişk di piraniya welatên Rojhilata Navîn de heta qasekê pişkdariya kêmrang ya jinan di siyasê de şirove biket.

Hevpişk nebûna jinan di siyasê de sedem û hegerên cur be cur hene. Dema jin hewil dide ku di siyasêten civakên paremayî, eşîretî û kilasîk de beşdar be, dê astengên yekcar zor hebin.

Îro em dibînin ku jinan pişkdariyê kêmtir di nava siyasê de heye, hegera vê yekê jî eva ye ku jin di warên civakî û aborî de paşketî mane. Her çend ku jinan di warê perwerdeyî û warê din de rola xwe baş listiyê, lê eva nebûye egera vê hindê ku di nav siyasê de rolekî berçav hebît. Eva yasa nine ku li dijî mafên Jinan rawestayê, belkî paşvemana civakê yê bûye sedema pêpeskirina mafên jinan. Em dibînin ku di gelek civakan de yasayê maf bi jinan daye, lê ji ber ku civak bi xwe gelek paşve ma ye, nahêle ku yasa nehên bikar anîn. Ji jinan re sînorek diyarîkirî ye coxrafi nine ku ji boy wê herêmeke hilbijartinê destnîşan bikin.

Jinan û bi taybet jinên berbijar dixwazin ku di kiryar û piraktîkê de wek mêran bin. Tenê bi berfirehkirina armancên demokrasîyê wekheviya jin û mêran avedan dibe. Bi awayekê ku pirsgirêkên wekî newekheviya malbatî, kontîrol li ser aloziyên zayendî(cinsî), kontîrola jinan li ser hikûmetê û bidestxistina wekhev ya çavkaniyên giştî, çareser diket.

Bi rastî di Rojhilata Navîn de demokrasî dê bibe pirek di navbera warên giştî û taybetî de. Di nav civakên ku jin û mêr bi hev re cuda ne, siyasê qadek e ku ji mêran re tê hesibandîn. Di xwîndinekê de ku Navenda Xwîndînen Stratejîk di warê jin û demokrasîyê di welatê Urdonê de hatiye çapkirin, sedê heşt ya jinan li ser wê bîr û ramanê bûn ku mêr kesayetiyeke ramiyarî ya çêtir heye û mêr dîplomateke bihêz e.

Pirs civakîkirina jinan bi awayekê hatiye têgihîştin ku jin siyasê bi tiştêkî cîhanî dizane. Di Rojhilata Navîn de jin bi curekê hatiye perwerde kirin ku bi bindestî û kêmasiyên xwe, bawerî hebe. Jin di Rojhilata Navîn de li ser vê bîr û ramanê ye ku ola Îslamê jin ji siyasê qedexe yan berbend kirine ku di ayîna rastîna ya Îslamî de ev tişte çî nine.

Jiyana mêr ji ya jinê aqilmendtir û bihêztr e û dikare di siyasê de serkevîtir pişkdar be. Piraniya jinan li ser vê baweriyê ne ku jin îhsasî û mêr eqlanî ye. Piraniya van dibêjin ku naxwazin endamê çî partiyekê bin û çî hezkirinek nînin ku alîgirê partiyekê bin, heya jinên xwendevan jî li ser vê baweriyê ne. Vê demê em dibînin ku di Rojhilata Navîn de jinê xebat û hewleke zor daye li ser pêkanîna hindêk yasayan derheq bi perwerde û şareza kirina jinan, jordebirina zaniyariya siyasî ya jinan, wekhevbûna jin û mêran, baştirkirina mafê jinan li nav yasaya medenî.

Du bizavên giştî di warê xebata jinan de heye: **Yek**, **bizava Sekolar**. **Du**, **bizava Îslamî**.

Femînîstên sekolar daxwaza demokrasîyêkî Rojavayî dikin, lê Femînîstên Îslamî bîr û ramanên daxwaza xwe di çarçoveya peyvîneke Îslamî de didine diyar kirin. Piraniya rexnegir dixwazin ku Îslam di çarçoveya Îslameka Lîberal de bihêz şirove û lêkolîn kirin, ji ber ku ev rexnegir dibêjin ku hinek tefsîr û şiroveyên ola Îslamî li dijî Îslamê ne. Gotara Îslamî ya Lîberal di gel dijberatiya Îslama dewletî rû bi rû bûye. Bihevrebûna xebata jin û mêran ji hewcehiyên here girîng yê civaka îro ne. Bê guman nebûna jinê çî di karê aborî, ramiyarî, çandî, civakî û gişt karên din de xesarek gelek zaf ji leşê civakê dide û nivîşkan bûna wî leşî nîşan dide û cudahiya zor di navbera civakên welatên Rojhilat û Rojavayê de vî tiştî baş dide barçavê me.

Qetlên namûsî kiryarên biheq yan hov?

Amadekar: Emîr Şuaivend

Ji encama derbasbûna qonaxan, bo mînak ji kevneşopiyê bo modernîtê û sazkirina hevbendiyekê di navbera baweriyên kevn û zanista îroyîn de, gelek kevneşopiyên cur bi cur di kûrahiya naveroka xwe de tevlihev û tîk diçin. Baldanekî yek aliyane bi rûçika tîtal û kevneşopiyên kevnar dibe sedema bê hay û bal mana mirovan ji kerameta mirovî. Ev yek jî wisan dike ku emegdar bûn bi



kevneşopiyê bi ser kesayetiya mirovî de zal be. Kiryarên weke **qetlên namûsî** ku reh di baweriyên kevn yên gelemperiya xelkê civakê de heye, yek ji rûçikên vê pêvajoyê ye.

Di qetlên namûsî de zilam, bav, bira, kur û her mêrekî din yê malbata jinê li bal xwe kuştina jinê bi destê xwe rewa û bi heq dizane. Ev ramana han ku serçawe ji serdemê cehaletê digre, hê di nava gelemperiya mirovan (jin û mêran) de berdewam e. Gelek ji Mêr jinê weke jîndarekê dizanin ku girîngtirin karê wê bicîanîna meyl û xerîzeyayazendî ya mêran e.

Li gorî xwedî ramanan, piraniya Mêrên ku dest bi qetlên namûsî didin, ji dest nexweşiyên cismî û sewdayî di ezabê de ne. Gelek ji zilaman li gorî cura nêrîn û astê xwendebûnê ve di astekî nizim de ne. Piraniya wan bi sedema ku ne xwediyê kesayeti, zengînî, hêz û kerameta civakî ne ku ev seha xwe ya xwedî milkbûn û kesayeti bexşiyê bi cih bînin, lewre jî ev jina malbatê weke milkê xwe dizanin û kesayetiya ruhî û sewdayiya xwe bi terzekê di wî karê xwe de dibînin. Lewre jî dema biçûktirîn şikekê di jina malbatê de bibînin karê wê bi xiyaret û kuştina wê jî rewa dizanin.

Bi sedema perwerde û elimandina şaş û nêrînen cur bi cur yên civakê, hebûna jinan di nava civakê de xwe di xwe de bi şik û bi gumanê re ye, lewre jî di civakê han de axavtin, kenî û her peywendiyekê jinê bi cinsê hember re dikeve ber êrîşên raveyên cur bi cur. Balkêş e ku piraniya mêrên ku tûşî karên ne bi cî û xilaf dibin, pêtir ji kesên din dest bi qetlên namûsî didin.

Pêka xasmaniyên hundirî yên jinan ku meyla wan bi darketina tenahî û rihetiye di çarçoveyekî dilovanî û zayendiya mêrekê ye, jinên ku li derveyî vê çarçoveyê peywendiya cinsî bi kesên din re digrin, ji destê nexweşiyên ruhî û cismî ve dinalin, çareserî ji bo jinên han tenê jê hay bûn û çavniheriyên bijîşkî û sewda dermanî ye.

Dema ku zilam bi her sedemekê li derveyî malbatê de peywendiya cinsî digrin, jin jî bi sedemên cur bi cur heq didin xwe ku reftarên taybetî hebin. Lewre jî piraniya kiryarên jinan yên ne exlaqî dijkiyarek e li hember kiryarên hevjiyên wan.

Jêder: Malpera Nûçegihana Sîna

Fonda Muzîk û Hunerê ya Şivan Perwer dest bi xebatê kir

Hunermendê navdar yê Kurd, Şivan Perwer dest bi avakirina Saziyekê nû kiriyê ku armanca wê xizmet û nasandina çand û hunera Kurdî ye.

Fonda Muzîk û Hunerê ya Şivan Perwer ji bo çand û hunera navnetewî wek Dengê Kurd ji bo cîhanê xwe dide naskirin.

Di parek ji daxuyani û programa vê Fondê de hatiye:

"Vîzyona Fonda Şivan Perwer ji bona çand û hunera navnetewî ev e; ji bo paş û pêşeroja mirovantiyê ku bi pîrensîba toleransekê gerdûnî, li rêgeh û şopa aştxwazî, hevkarî û destbiratî herdem elementên çand û huner, bibîranîn, dîroka Kurda di jiyana rojanî de lêkolîn, vejilandin, nûjenkirin, pêşxistin û dewlemendkirin e. Bi çand û hunera mirovantiyê re danûstandin, li gel wan eymet û rûmeta berhemên afirandinên mirovantiyê de cih girtin û xwedanênaskirin e. Armanca daxwaziya piratîk jî herdem ji bona hevkarî, alîkarî û pêşvebirina muzîk û muzisyen, huner û hunermend, ziman, rêziman û zimanzan, wêne û wênevan, wêje û wêjekar, şano û şanoger, nivîs û nivîskar û film û filmçêker e. Ji bona di warê navnetewî de pêkanîna dosti û destgirtina gel û miletan, diyaloga hevaltî û vekirina

rêgeha derfetên aborî û civakî ye."

Di doma programa Fonda Çand û Hunerê ya Şivan Perwer de hatiye: "Fonda me serbixwe ye lê bê teref li xizmeta hemû rêxistin, saziyên hunerî û (konevan) siyasî ye. Li gel wan herdem hevkar, alîkar û cihgir e. Rêzdarî kar û bar e. Dost e, heval e.

Kesên navnetewiyên bi nav û deng ku di nava xizmeta (krouatorium) endamiya firazî de cih girtine ji bê teref in. Emê krouatorium ji were di demeke nezîk de zelal bikin.

Têkiliyên Fondê bi hemû komele, Enistîtu, Akademî û saziyên çandî û huneriyên Kurd û navnetewî re heye. Herdem li gel wan ji bo hevkarîyê ji xizmetê re amade ye. Bi UNESCO re hevalbend e. Di saziya gelên navnetewî (ECOSOC) de qeyd (akredite) bûye."

Navnîşana malpera Fondê li ser înternetê:
<http://www.sp-f.org/>


Peywendiya tund û tûjiyê dijî jinan û rewşa karê wan di gel hev



Li gor lêkolînan, qasê pirsgirêkên çavkanî girtî ji tund û tûjiya fîzîkî dijî jinan û rewşa karkirina jinan bi hev re pêwendî hene û tund û tûjî dijî wan jinên ku kar dikin bi nîsbet kêmtir e. Ji aliyê din azardana hevjinan piranî ji aliyê wan kesên ku xwediyê xwendina di astekî bilind de ne tê xuya kirin. 90 ji sedê ya goriyan, 3 yan 4 caran pitir dikevîne ber tund û tûjiya fîzîkî ya mêrên xwe.

Jêder: Malpera irwomen.com

Zêdebûna hilatina keçan û azardana zarokan li Ehwazê



Saziya Jinên Îranê: Pirsgirêkên civakî, hilatina keçan û azardana zarokan li Ehwazê de zêde dibe. Li gor gotinên Sara Çarosayî, karnasê karê jinan li Xozistanê, pirsgirêkên navçeyî, qewmî û Eşîretî û nezanebûna malbatên derdorên bajarê Ehwazê bûye sedema jêhelçûna wan arîşane.

Pejirandina hukma îdamê ji bo kurekî 16 salî

Li gor rapora nûçegihana Fars, hukmê îdamê ji bo nûciwaneke 16 salî ku bi guneha kuştina hevalê xwe hatiye girtin, ji aliyê dadgehê ve hate pejirandin. Ew kure di gotinên xwe yê dawiyê da xuya kir ku merema wî kuştina hevalê xwe nebûye, ew kuştina bêdestî bûye.

Belengazî di Îranê de

Li gor serhijmêriyên vê dawiyê yê belv bûyî ji aliyê Banka Cîhanî ve, yek Milyon û çar sed hezar kes li Îranê jiyana xwe ya rojane bi dahateke kêmtir ji yek Dolarî birêve dibin. Banka Cîhanî di rapora xwe ya dawiyê de derheq rewşa belengazî di cîhanê de ragihand: %21 ji xelkê cîhanê jiyana xwe ya rojane bi dahatekî kêmtir ji yek Dolarî birêve dibin ku di vê navberê de welatên Newala Afrîqayê di pileya yekemîn de ne.

Jêder: Nûçegihana Fars

Yek ji sê ya xelkê Îranê muitad in



Li gor serhijmêriyan zêdetir ji 20 milyon Îranî tûşî pirsgirêkên çavkanîgirtî ji îtiyadê ne. Temenê piraniya wan muitadane di nav 25-34 saliyê ye û zortirîn madeya bikarhatî ji aliyê muitadan ve Tiryak e. Meraqa diwar, pirsgirêkên meraqê, kesayetiya ne civakî û hwd... hinek ji pirsgirêkên wan muitadane ne ku dibe sedema dûrketina wan kesane ji civakê.

71 ji sedê ya nûciwanên Îranê tûşî meraqê ne

Li gor lêkolînan nû ku di Îranê de hatine kirin, %71 ji nûciwanên Îranê tûşî meraqê bûne, lê di vê navberê de qasê meraqê di keçan de zêdetir e. Ev lêkolîna dide xuya kirin ku keç du beramberî kuran tûşî ve nexweşiyê bûne. Meraqî heya qasekê tevî rihetiya malbatiya peywendî heye, bi terzekê ku ew nûciwanên ku ji malbateke belengaz de dijîn, meraqeke tundtir hene.

Jêder: Nûçegihana Sîna

Zêdebûna zext û givaşê dijî jinan



Cemal Kerîmî Rad, Berdevkê Saziya Dadê ya Îranê û wezîrê Dad yê pêşniyarkirîyê Ehmedînejad di gotinên xwe de zêdebûna zext û tepeserkirina dijî jinan bi hêceta li xwe nekirinê ji aliyê dewleta Ehmedînejad, rêkareke baş zanî.

Eva di halekê de ye ku piştî hatina Ehmedînejad zext û givaş dijî jinan bi hêceta li xwe nekirinê zêdetir bûye û gelek jin û keç bi guneha li xwe nekirinê tên binçavkirin.

Jêder: Malpera iranazad.com

Daxuyaniya Rêxistina Efûyê ya Navneteweyî derheq îdama zarokan di Îranê de



Rêxistina Efûyê ya Navneteweyî bi belavkirina daxuyaniyekê nigeraniya xwe ji îmkana îdama du nûciwanên din li Îranê da xuya kirin.

Rêxistina Efûyê ya Navneteweyî ragehand ku rejîma Komara Îslamî di heyamê sala rabihurî de aliyê kê 7 nûciwan ku temenê wan jêr 18 saliyê de bûne, îdam kiriye û niha 2 nûciwanên 16 û 17 salî bi navên **Mistefa û Sîna** jî li benda îdamê ne. Berpirsiyareke Rêxistina Efûyê ya Navneteweyî derheq îdama nûciwanên bin temenê 18 saliyê ji aliyê rejîmê got: Binpêkirina yasayên navneteweyî yê dijî îdama zarokên jêr 18 saliyê ji aliyê rejîma Komara Îslamî ya Îranê ve, cihê nigeraniyê ye.

kesan xweş jî tê. Divêt ku hin pîrek li hespê tazî jî siwar dibin û divêt ku hin kes fantazyên xwe bi pêşdetir dibin ku li ser pišta wî ya tazî tiştêkî jî bi hev dikin. Hûn pê diherin qada şerî û ew di bin we de dibe Duldul, ew dibe ba û babîsok, lê gava hûn di rêyekê re herin û dujminê we têkeve pêşiya wê, we li ser pišta wî bikuje û ew bi xwe li wî hespî siwar bibe, ew di bin we de çawa diçû, di bin we de çi hêz û xweşî dida we, ew dê eynî xweşiyê bide dijminê we jî. Ew dê ji wî re nebêje, "na" û ew ê di bin wî jî de bide çargavê.

Lê kûçîk? Hûn ê goşt bixwin, hestiyên xwe bavêjin ber wî. Hûn dê nanê nerm bixwin û yê hişk bibe ya jî kufikî bibe, bavêjin ber wî. Hûn, ne wî dişon û ne jî vedîşon. Heger neyê hesabê we, hûn dê pê li hustuyê wî bikin û yekcarinan jî bi keviran bera wî bidin. Heger şêz têkevin wî, hûn alîkariya wî nakin ku ew ji wî ezabî jî xelas bibe. Hûn Zivistanê wî li ber ba û baranê dihêlin û ew li ser berfê dirazê. Heger hûn di vî deriyê re bera wî bidin, ew dê here li ber deriyê we yê paşiyê bisekine û ew dê te ji diz û keleşan, ji dost û dijminan biparêze. Ji ber ku ew heywanekî sadiq e, loma ez bi Hespî re nehatim, ez bi apê kûçikî re hatim.

De Mîrî ew Pêxemberê Xwedê bi wan gotinên xwe li ser textê wî mest kiriye, ew bûye kurrk. Gotinên Mîrî ketine serê wî û ew poşman bûye ku wî heta wê rojê em bi tiştêkî nehesibandine. Wî hertim guh daye wan heywanên şenek ên derewîn ku karê wan paşgotinî û zema alamê ye. Wî ew şêrê qulbiçûk yê sercimimî jî kiriye serkana heywanan. Wî ew qaweta hanê daye wî bêbavê piligî ku feqîra xezalê di nav lepê wî de dibe mîna zarokeke ji terefê bavê xwe ve bê tecawiz kirin.

Mîrî kiriye ku ew nikaribe ji cihê xwe tev bilive û bi zorê permekê bide xwe û bibêje:

- Kuro Jîjo, ev gotinên te, gotinên aqilmendan in, haa! Kuro bi qesema navê Xwedê, min nizanibû ku tu ew qasî biaqil î.

Mîrî jî xwe heta bi belika guhan nepixandîye û gotiye:

- Estexfûrelah, Ya Hezret. Ma ez çi me ku aqilmendiye bikim. Ez jî ji xwe re tewtewetiyên dikim, ma hedê min e ku ez aqil bidim te.

Wî serê xwe hejandiye, lê ew tevziye. Destên wî li paş wî bûne û ew di orta cimeetê de çûye wî serî û hatiye vî serî. Ew hatiye di ser serê Mîrî re sekiniye û midetekê jî jorî de, lê temaşe kiriye. Wî ji serî û heta bi binî Mîrî ji nuh de keşif kiriye. Bi wî re miziciye û destê xwe di rîha xwe de daye. Nûr jê hatiye xwarê. Serê xwe rakiriye, li esman nêriye. Destên xwe ber bi Xwedê ve kirine û gotiye:

- Ya Rebî! Ez bi qurbana nexşên te bim ku te li van mexlûqên xwe ên reben kiriye.

Û destên xwe bera ber xwe dane. Hemû heywan, teyr û teba, bêdeng bûne. Deng ji kesî jî nehatiye. Heta, Botbotik jî li ser qûna xwe rûniştiye û li wan temaşe kiriye. Hezret vejeriyaye ser Mîrî û gotiye:

- Ma tu çi dibêjî Jîjo, ev ava heyatê ku ji terefê Xwedê Teala ve ji min re hatiye şandin, ez vexwim, ya na?

Her kesî bi meraq li Mîrî temaşe kiriye, bê ew dê çi bibêje.

Mîrî gotiye:

- Ma hema li ser raya min maye ku tu dê vexwî, an venexwî?

Wî gotiye:

- Her kesek xwediyê raya xwe ye, Jîjo! Tu jî ya xwe bibêje!

Mîrî meraq kiriye ku kesekî mixalefeta vexwarinê kiriye, ya na. Piştî wî fahm kiriye ku her kesî gotiye, "vexwe", wî destên xwe dane ser hev û gotiye:

- Venexwe!...

- Çima Jîjo?

- Heger tu vê avê vexwî, tu dê ebedî li dinyayê biminî. Tu dê yextiyar bibî. Tu dê di bin xwe de birî û bimizî. Xelk û alem dê berê xwe ji ber te biguherin. Ya baş ew e ku mirov di cihê şêrîn de here ser heqîya xwe, bêyî ku têkeve ber dest û lîngan.

Ew fikiriye. Mîrî careke din jî ew bi sed tîrî deyhndar derxistiye ku wî heta wê gavê ew nekiriye şûna zilaman. Wî berê xwe daye wan heywanên ahmeq ên debdebe û gotiye:

- Ez bi navê Xalîqê jorîn dikim ku ev Jîjo bi heq e. Xebera wî ye û ez vê avê venaxwim ku ebedî li vê dinyayê biminî û mezîniyê li we ahmeqan bikim. Bila yekî din bê û heger qaweta wî heyê, bila ew zimanê we hemyan fêr bibe.

De îcar we dît, bê kerametên me çawa ne? Ez ji sulaleyê wî zatê hanê me ku Hezretî Silêman şahê bej û avê, ji gotina wî derneketiye... Divêt ku gelek kesan hetanî niha jî nizanibû bê Hezretî Silêman ji bona çi ew ava hanê venexwar. De wa ye bi xêra min, bi xêra Jîjoyê pişt bihistirî ew tiştê hanê hate eşkere kirin, ma ev jî ne bes e? Nexwe, ez bi kêrî tiştêkî hatim.

KOMA KAMKARAN NAXWAZIN CARÊ BERHEMÊN XWE DI ÎRANÊ DE PÊŞKEŞ BİKIN



Koma Muzîkarên Kamkaran (di Farsî de ji wan re Kamkarha tê gotin) yek ji malbatên Kurd li Kurdistanê Îranê ne ku ji heft birayan û xwişkêkê pêk tê. Koma wan yek ji komên navdar û zanistî yê muzîka Îranê û Kurdistanê tê hesibandin. Karê wan yê bingehîne hunerî ji muzîka Kurdî ya dewlemend û rengareng bi awazên tûj û ji rîtma muzîka Îranê ya klasîk pêk tê.

Vê Koma Muzîkvanîyê îsal îlan kiriye ku bi sedema piştgîrî nekirin ji karên wan, ev êdî çi din naxwazin konseran li Îranê bidin û albomên nû biweşînin. Koma Kamkaran ku pêtir ji 5 salan e çi albûmek di hundirê Îranê de pêşkêş nekirine, hertim gotine ku di dîroka xebata wan de heta Qiraneke û kereke kaxezê alîkarî bi wan re nehatiye kirin û navendên dewletî jî tenê bi bernameyên propadandayê girîngî û pûtêyê didin.

Koma Kamkaran li Kurdistanê Îraqê

Di meha çûyî (Gelawêjê) de, Koma Muzîkvanên Kamkar hatine herêma Kurdistanê Îraqê û di hola Mîdya ya bajarê Hewlêrê de konsereke mezin dan. Qirar e ku di destpêka heyva Oktobêrê de li Madrîd, serbajarê Îspaniyayê bi awayekî berfireh karên xwe yê hunerî pêşkêş bikin. Hoşeng Komkar Serokê koma Muzîkarên komkar got: Em di vê seferê de, kar û berhemên xwe yê nû ku di Îranê de nehêlane em wan bidin weşandin yan piştgiriya wan nekirin, ji aliyê **Kompanya Çarçera** ya Hewlêrê ve dê biweşînin û pêşkêş bikin.

Orkesterî Senfonîk ya **Malmo** li Swêdê, di 5'ê Oktobra 2005'an de li konsera xwe ya mezin ji berhem û muzîkvanên kamkar mifahê wêrdigire û mêvandariya wan dê bike.

Kar û xebatên muzîkariya vê koma hunerî ya Kurd bala gelek hunermendên cihanê bo aliyê xwe kişandiye. Lê belê em dibînin di bin siya desthilatdariya rêşperest û dijî hunerê de, ev koma han neçar dimîne kar û berhemên xwe li derveyî Îranê de pêşkêş bike.

HEZKIRIN

ADAR JIYAN
adarjiyan@mynet.com

Hezkirin, her çendî ku xwediyê wateyê ferhengî û civakî be jî, wekî dijawateya nifrîn, kift û kerexeyiya derûnî; çeqa hest, helwest û dilîniyê mirovî tê zanîn. Her mirovek meyl û bala xwe dide ser hezkirinekê. Û her mirov bi hezkirinekê re dijî û pê mijûl û eware dibe.

Peywir û pêwendiya hezkirinê, bi giranî li ser hunermend, ramanwer û rawşenbîrên pejnkar dimîne. Belê mirov gelek caran dibîne ku zanyarên dinê jî vê peywir û vatiniyê dûr dimînin û bi sistî û pistî tevdigerin.

Hiş û hişmendiya mirov a ku bi saya pênc sehekîyên mirovî heyînên dinê dihîshisine, zêde nîrxê nade hêza hezkirinê. Heta gelek caran wê di ser guhê xwe re diavêje. Hin caran hê pêştir diçe û hezkirinê wekî hestê tîkel, demdemî û xapînok dibîne. Her wekî din jî hezkirinê gelek caran wekî efyona hişê mirov, tewşîk û peşikandineke mengîwer, an jî dek û dolabên derezanistî tê bi nav dîke. Ji bo wê ye ku mirovên xwediyê vê raman û hişmendiyê ango gelek ronakbîr û zanyarên dinê li ser vê mijarê serê xwe naêşînin û bêdeng dimînin. Hin jî wan jî, wê wekî rastînoyekê dibînin belê, zêde guh nadenê. Û hin jê jî wê wekî tiştêkî bêfêde, bêwate û fentezî didin wesfandin.

Cehd, koşan û hewldanên ku bi mebesta hezkirinê tên kirin û her wiha lebk, lebat û xebatên di riya hezkirinê de tên bikaranîn, bêsîk ne tiştên asan û lasayî ne. Dibe ku eleqe û tîkiliya ku bi hezkirinê re tê danîn, ji bo hin kesan bi qasî daketina bîreke(çaleke) kûr a bêbinî xeternak were dîtin. Û heta dibe ku ji hêla hin mirovan ve, bi qasî ku mirov nikaribe nêzîkî wê bibe, erjeng û tirsnaq jî bête pejirandin. Belê ligel her tiştî, sersarkirî û xemsariya civaknas, mirovperwer û ramanwerên dinê ya li hember vê babetê, li aliyekî çîminjêyî, keslaneyî û tirole'yî ye; û li aliyê din jî pêkenî, seyr û sosretî ye.

Çi takekes dibe çî jî civak, çî jin dibe çî jî mêr, çî biçûk dibe, çî jî mezin... berê ku mirov bi hezkirinê mijûl û tîkildar bibin, divê wateya wê ya rastîn baş bizanibin. Belê wekî ku li jorê jî hate diyarkirin, ev yek qet ne tiştêkî hêsa ye. Û wate, nîrx û girîngiya hezkirinê bi çend peyv, gotin û vegotaninên manîdar jî nayê sînardarkirin. Lewre hezkirin ne hin tişt e. Ew, gelek tişt, heta her tişt e.

Wateya hezkirinê, ne di tu vegotin û navandinên sînardar de bi cih dibe û ne jî di ferhneg û pirtûkên stûr de tê hilandin Tenê ne hezkirin jî; tu hest û dilîniyên derûnî, nayên ravekirin û watedarkirin. Têne jiyîn û hishisandin. Hezkirin, nefrîn, rêzgirtin, kerb, kîn, keser, şahî, xemgînî û hwd... hemû wekî bertek, vebizav û reaksiyona hewisîna dilîniyên derûnî tene zanîn û nasandin. Û mirov nikare van hestan di nava qalib û qewareyên teng de biesirîne an jî bifetisîne. Ji xwe tiştên ku tu car nayên tepisandin yek jê fikr û ramana mirov a ku ji hişmendiya wî/wê dinime ye. Û ya din jî hest û dilîniyên wî/wê yê serbest û azad in.

Hezkirin, dilîniyê azad e. Tu sînor, kelem û astengiyan nahebîne. Tu bêdîlî, bêxêrî û bêedebîyan naecibîne. Tu durûtî, konetî û bêrêtiyan napejirîne. Nayê çewsandin, melisandin û tepisandin. Nayê qedexekirin, manîkirin û hemandin. Nayê mandekirin, windakirin û tunekirin... Ew, bi mirov re peyde dibe; bi mirov re dijî û bi mirov re bi dawî dibe. Hezkirin Di her hilm, çirke, xulke û gavê de veşartî ye. Li her deriyê dide û di her bihurî re derbas dibe. Li her cih û her warî peyde dibe. Li her qadê di hewe. Bi xwe re li hev e. Û bi hemû hest û dilîniyên hemberê xwe re jî... Ango hezkirin ne di hundirê mirov de ye; berevajî wê, mirov di hundirê hezkirinê de ye.



Ne pêdiviya mirov bi hezkirinê heye û ne jî ya hezkirinê bi mirov heye. Çimkî ew, hestê erênî û xwezayî ye. Belê tiştê ku pêdivî pê heye zanîn û zanyariya hezkirinê ye. Bi vegotîneke asantir û vekirîtir, pêdivî bi zanebûna jixwehezkirin, jêhezkirin û jihevhezkirineke rastîn heye. Yanê her kes jî hezkirinê hez dîke; belê tu kes zêde nîzane jî hevdu hez bike. Pirsgirêk jî ev e. Bo nimûne; dayik gava ku bi zarokê/a xwe şa dibe, ji nezani (hin caran jî bi zaneyî) wî/wê geze dîke û wî/wê bi girî vedike. Bêawarte, her kes vê yekê wekî hezkirinê bi nav dîke û dipejirîne. Bi ya min be na; lewre hezkirin, ne êşandin û bêzarkirin e. Hezkirin aramî, şabûn û şadîbûna hevpar a dualî ye. Em li vir dibînin ku ne zarok bi wê şabûnê şa dibe û ne jî dayik bi wî girîyî dilxweş û aram dibe. Bêguman dayik bi niyet û armanca hezkirinê vê yekê dîke; belê encam ne li gorî dilê tu kesî ye. Li vir kêmasî çî ye? Kêmasî ne hezkirin û nehezkirin e. Ne gezkirin û êşandin e jî. Kêmasiya mezin, zanebûna hezkirinê ye. Ku dayik bizanibe ji zarokê/a xwe hez bike, dê encam erênî be. Û dê wê çaxê, dayik û zarok bi hev şa bin û li hev bin.

Pêkan e ku mirov ji bo hemû mirovên din jî wekî nimûne heman mînakê bide. Belê divê baş bê zanîn ku hemû cureyên hezkirinê, hewceyî bi zanîn û zanebûna hezkirinê heye. Ji bo wê jî, divê beriya her tiştî em bizanibin jî hevdu hez bikin; hezkirinê hem bitehmînin û hem jî bidin tehmîndin.

Emê nivîsara xwe bi gotina "Eric Fromm" a xweş û manîdar bi dawî bikin: "Mirov dibêjin qey jî hezkirinê hêsatir tiştêk nîn e. Nexwe, behreya hezkirinê bi her kesî/ê re heye; belê a girîng zanebûn û sepandina wê ye."

Roman û Ewropa

Mîlan Kondera

Wergeran ji Farsî: Emîr Şuaîvend (Beşa 2)



Hevdem tevî jar bûna desthilatê, Xwedê bi ser cîhana ku nîzama "Erzişî" ya wê birêve dibir, rindî û xirabî ji hev paqij dikir û bi her tiştî wateyek dida, Don Kîşot jî ji koşka xwe hate der û kete hundirê cîhanekê ku êdî ev cîhan nedinasî. Bi bê hebûna dadwerek yan jî biryarekî yekcarî, cîhanê dem li dest keşekî bi sam girte xwe. Ev take rastiya pîroz bi ser hezaran rastiyan hevpar di nava mirovan de bihirî. Destpêka serdemê nû eva bû û hevsû tev wê, roman, ango mînak û rûçika vê cîhanê hate zayîn. Ger ku em ji ramanên Dekart wekî pêkhateyekî gişt alî binêrin û bi tenê di hember cîhanê de bisekinin, em dê xwe di rewşekê de bibînin ku Hêgêl bi heq ev yek lehengane binav dikir.

Ger ku em weke Serwants, ji cîhanê re rêjeyî bifikirin û xwe di hember nek rastiyeke berteng û yek alî, belkî xwe pêşberî komek ji rastiyan newekhev bibînin (ku her yek jî wan di ramanekî fantezî, bi navê kesayetiyeke tê berçavan) û eger em vebirîne weke raza nebûna vebirîne bizanin, helwesta me her bi wî qasî helwestekî pêş lehengane ye.

Heq bi kî ye û neheq kîjan e? Don Kîşot yan yê din? Di vî warî de pir hatiye nivîsandin. Hin kes romana Serwants bi rexneya fêmxwazane û îdealîzmekî sergêjbûyî di Don Kîşot de dizanin. Hin kes jî vê çendê di hêybet û bilindkirina ev îdealîzma han dizanin. Her du rave jî şaş in, ji ber ku ew rehên romanê ne weke pirsiyarekê, belkî wekî berevanekî sincî dihesibînin.

Mirov xwaziyarê cîhanekê ye ku tê de rind û xerab bi eşkere ji hev paqij bin. Hezkirina zatî ya mirovan bi berevaniyê, zaftir ji têngihîştina mirovan e. Ol û îdeolojî her li ser vê xwastikê qahîm dimînin. Tenê rêya ku mirov dikare bi ramanê re pêk were eva ye ku mirov ziman û naveroka romanê bi tewawî biperjîne. Lê gereke ew bizanibin heq bi kî ye. Yan Anakarniya goriyê zalimekî dilreq e yan Karnîn goriyê jinekî bêexlaq e, yan jî "K"1 di dadgehekî neadilane de bêguneh tê nasîn, gelo ew bêguneh bû yan jî dadgeh wêneyek ji edaleta pîroz bû û K gunehbar bû.

Ramanek ku li ser hîmê mercên ew yan ev hatibe ava kirin nikare bersivderê sereke yê pirsên mirovî be û herweha nebûna biryarekî yekcarî napejirîne ev bêhêziya han tê wateya vê çendê

ku fêmkirin û pejirandina hikmeta romanê karekî pir estem e.

Don Kîşot kar û bizavên xwe di cîhanekî yekser vala û bêdawî de dest pê kir. Wî dikarî di rewşa xwe ya derveyî bimîne yan jî vegere malê. Di wî serdemê seretayî de hemû roman seferêkî xuya bo cîhanekî bêdawî bûn. Bo mînak, di rûpela yekem ya pirtûka Jak Qedergira, berhemê Dîdro, Jak û erbabê xwe di seferê de ne. Em nizanin ew li ku hatine û kur de diçin. Ev du kesayetî di serdemekê de dijîn ku destpêk û encama vê tune ye, ev di keşekî bêdawî de ne, Ev di hembêza Ewropayekê de ne ku heta heta ye dê li ser pêyên xwe bimîne.

Piştî niv sedsalekê, di berhemên Balzak de asoyên dûr yê Dîdro winda bûn, rast weke dimenekê ku heta heta li pişt apartemanên modern yê civakî weke yê Polîs û Artêşê winda bû. Berevajî serdemê Servantes û Dîdro, vê carê êdî dem bi kêfxweşî nedibihurî, belkî li ser rêya asin(rêyl) ya dîrokê diherikî. Mirov bi hêsanî dikare siwarî vê rêylî be, lê nehatine xwara wê gelek hêsan nine. Di rastî de jî hêj vê rêylê dimenekî bi xof negirtiye xwe, bigre ev xweşik jî tê berçavan; hatiye garantî kirin ku mosafirên li ser wê rêylê, wan destan û biserhatan dê bibînin û di dawiya xet de dê navnîşanan jî werbigirin.

Kêmek piştî wê, aso ji bo Êma Borarî Flobr hê bertengtir dibe û weke qefesekê xwe derdixe. Biserhat li wî berê xet de ne û heza gihîştin bi wan nahê hebandin. Xew û zîndî xew bêzariya jiyana rojane ji nav dibin. Bêdawîtî û berfirehtiya ji dest çûyî ya cîhana derveyî cihê xwe daye berîni û firehiya riha mirovan. Bi wî rengî bû ku tîrsa mezin ya zal bi ser takekes û bêsedemiya takî- ku yek ji şirîntirîn tîrsên Ewropayî ye- pişkiwî.

Lê di demekê de ku dîrok (yan jî eva ku di rengê hêzekî ban mirovî ya civakekî gelek bihêz de dimîne) di encam de mirovan di çengên xwe de digre, xewna firehî û bêdawî bûna rihê jî rengê xwe yê efsonî (cadoyî) ji dest dide. Dîrok êdî bala kesê bi bang û mizgîniya şanazî û mîdal danê nakişîne; heya ku tenê qasgirtinekê jî bi kêmkî dispêre kesekê. Di hember dadgeh û qesrê çî karek ji destê "K" tê? Karekî wisan ji destê wî nayê. Gelo ev her nikare mînanî madam Boarî xewnan jî bibîne? Na vê carê telî gelek bi sam û xof e û hemû hest û ramanên xwe hûd dike. Ev tenê dikare bi dadgeh û karê xwe yê pîvanê (qasgirtinê) bifikire. Riha wî ya fireh û bêdawî ger zemanekê hebû, niha ev tiştêk nine ji xêncî tiştêkî bêbar û ber.

1: Lehengê romana navdar ya Kafka- M

XAÇEPIRS

A: Emîr Şuairwend

		0 ₂							0 ₃
				0 ₅					
0 ₄									0 ₁

Peyva veşarti ○ ○ ○ ○ ○
1 2 3 4 5

Çeprast:

1. Dengê xweşiyê ku jin diqirin- Parek ji çekê ye
2. Navekî Kurdî- Meger- Kal
3. Temen- Hevza avê- Îşare bi zayenda mê
4. Nebz
5. Dişa diya mirov- Pêtir taybet bi keçan e
6. Vê carê- Feqet
7. Di siyasetê de ajavegêr
8. Mayeya jiyane ye- Di Turkî de çêl- Di rêza alfabeya Kurdî de peyva navîn
9. Ehlî kirin- Dêrd- Kevirê qît
10. Erebnîne- Xîstek e ku ji bo xemilandina dîwaran bi kar tê

Serjêr:

1. Ji malbata Seyan e- Qonaxa pêş zewacê
2. Di Turkî de du- Pezê mê- Mentîq
3. Dengê ku di dengbêjiyê de gelek bi kar tê- Paranewe- Min û te
4. Petû
5. Mang- Di zaravê Hewramanî de îşare bi cinsê mê
6. Navê welatekê ku para duyem ji navê wê antîn e- Tarîtirîn reng
7. Di zaravê Soranî de keç
8. Ew û babê min ji babekê ne- Helbestvanekî Kurd- Li ku derê ye?
9. Kûrahî- Ger wiha ye- Hingiv saz dike
10. Musbet- Xêncî

FESTÎVALA SIRÛDA KURDÎ YA "BÛKE BARANE" LI ŞÊRWANA XORASANÊ

Yekemîn Festîvala Sirûda Kurdî ya **Bûke Barane**, roja sêşemî 26.07.2005'an li Şêrwana Xorasanê hate lidarxistin.

Di vê Festîvalê de 6 Komên Sirûdê yên **Arman, Arif, Diyar, Durne û Şahê Cihanê** ku ji 100 hunermendên Kurd pêk hatibûn, bername û berhemên xwe pêşkêş kirin.

Herwiha Koma Sirûda **"Bûke Barane"** bi rêveberiya Ezîzula Refetî ku ji 40 xwendekarên Kurd yên Şêrwanê pêk hatibûn, sirûdên herêma Şêrwanê wekî: **Kurmanc Ziman, Kurmanc Perçem û Kurmanc Namûsa Min** pêşkêş kirin.

Bajarê 16000 kesî yê Şêrwanê ku piraniya rûniştvanên wê ji Kurmancan pêk tê, bingeh û çavkaniya muzîka Folklor û Miqamên Kurdî ye û gundê Xanliq ya vî bajarî wekî navenda hunera muzîka Kurdî ya wê herêmê tê naskirin.

Bersîva hejmar 21

	p	e ₂	n	a	k	u	r	d	
b	a	b	a	n		m	i	a	f ₁
i	i	a	m	i		i	m	i	a
n	a	s	û	s		d	i	k	o
	n	i	s	k					
						k	e	t	
k	a	b	a	n		e	s	e	i
e ₄	r	e	b	e		d ₃	a	m	e
d	a	h	ê	l ₇		e	s	i	r ₅
	n	a ₆	r	ê		r	i	z	

Peyva veşarti f e d e r a i
1 2 3 4 5 6 7



Sêyemîn Kongreya Yekîtiya Ciwanên Demokrat ya Kurdistanê Îranê

Di bin dirûşma **Di pêxema piştgirî kirin ji xebata azadixwazane ya Ciwanên Kurd ji bo dijberî tevî rejîma dîktatorî di Îranê de**, Sêyemîn Kongreya YCDK Îranê seet 5:30'ê sibêdeya roja 22'ê Gelawêja 1384'ê Rojî (13.08.2005) piştî dehan demjimêr karê berdeyam dawî bi karê xwe anî.

Roja pêncşemî 20'ê Gelawêjê, Kongreya Sêyem ya YCDK Îranê bi nişandana filmek dukomenetî li ser dîroka Yekîtiya Ciwanan û piştî jî peyama vekirina Kongrê ji aliyê birêz Mistefa Merûfî, Sekreterê Berê yê YCDK Îranê û bi beşdariya endamên rêberiya PDK Îranê, Kadro û Pêşmergeyên PDK Îranê, endamên YCDK Îranê û komek heval û mêvanên YCDK Îranê dest bi karê xwe kir.

Ji aliyê birêz Mistefa Hicrî, Sekreterê Giştî yê PDK Îranê ve peyamek hate pêşkêş kirin. Kekê Mistefa pîrozbahîya lidarxistina Kongreya Sêyem ji endamên YCDK Îranê kir û bal kişande ser rewşa xirab û nebaş ya ciwanan di bin desthilatdariya Komara Îsalmî ya Îranê û herwiha rola



ciwanan wekî hêza bingehîn ya serhildana vê dawiyê yê bajarên Kurdistanê bilind nîrxand.

Belavokek bi navê **KONGRE**, Paşgira **Lawan** Organa YCDK Îranê hatibû amade û çap kirin û bi beşdaran re hate dayîn.

Di rê û resma vekirina Kongreya Sêyem de gelek peyam hatin xwendin. Desteya Nivîskarên **Agirî** jî peyamek ji Kongreya Sêyemîn ya YCDK Îranê re şandibû ku di kongreyê de hatibû pêşkêş kirin.

Ji taybetmendiyên sereke yê Sêyemîn Kongreya YCDK Îranê em dikarin bi kurtî wan xalên jêrîn bas bikin: Bilindbûna asta hişyarî û zanebûna endamên kongreyê derheq mijar û babetên cuda cuda ku bi eqlek evroyî û serdemiyane û di rewşeke demokratîk û şaristaniyane de li ser babetên Kongreyê bîr û rayên xwe didan xuya kirin, serxwebûna fikrî, bawerî bi xwe hebûn, pîşniyar û dîtinên dewlemend û balkêş ji bo Kongreyê û girîngîdan bi serhildan û tevgera ciwanên bajarên Kurdistanê Îranê û rengvedana wê di bas û qengeşeyan de û hwd...

Em serekvîna Sêyemîn Kongreya YCDK Îranê ji wan pîroz dikin.

Amerîka: Serkutkirina Kurdan ji aliyê dewleta Îranê ve cihê nigeranyê ye

Wezareta Karê Derve ya Dewletên Yekbûyî yê Amerîkayê dibêje ew raporên ku bas ji serkut û çewsandina Kurdên Îranê ji aliyê dewleta



Îranê ve dikin, cihê nigeranyê ne.

Berdevkê Wezareta Karê Derve dibêje rapor wisan didin xuya kirin ku li Bakur û Başûrê Rojavaya Îranê çend kes hatine kuştin û hejmareke zaf jî hatine giritin. Ev berdevk dibêje haşa û înkarkirina ji mafên kêmaniyan pîrsek e ku Rêxistinên Navneteweyî bi piştgirîdan bi belge û dukomentên bê hejmar selimandine.

Wezareta Karê Derve ya Amerîka ji Îranê daxwaz kiriye ku nerm bilive û rêz ji mafên hemû xelkê Îranê bigire. Ew raporên ku heftiya çûyî ji Kurdistanê gihîştine, bas ji vê çendê dikin ku di pevçûnên navbera xelkê û Polis li bajarê Seqizê de 13 kes jî neraziyan jiyana xwe ji dest dane.

Kuştina xebatkareke çeleng yê Kurd di meha Juiyeyê de bi destê hêzên Ewlekariyê yê Îranê yê bûye sedema pêkhatina xwepêşandanên rêzokî yê berfireh li herêmên Kurdistanê Îranê, ku di hejmarek ji wan de tund û tûjî derketiye holê.

Jêder: voanews

Amerîka: Çekên Îranî di Îraqê de hene

Dewletên Yekbûyî yê Amerîkayê dibêje ku çekên Îranî di Îraqê de hatine peyda kirin. Danald Ramsfild, Wezîrê Parastina Amerîkayê got ku ev çekên ku di kiryarên teroristî û teqînên ku di Îraqê de tên bikaranîn, ji rêya tixûbê Îranê bo Îraqê hatine. Ramsfild dewleta Komara Îslamî ya Îranê ji ber rênegirtin ji hatina çekan bo Îraqê û gihîştina wan bi terorîstan ji rêya sinorên Îranê bi tundî rexne kir.

Wî da zanîn: Tixûbeke mezin û dirêj di navbera Îranê û Îraqê de heye û eva ku dewleta Îranê pêşiya şandina çekên han



ji bo Îraqê nagire, alîkarî nekirina wan tevî cîgirbûna ewlekarî û tenahiye di Îraqê de ye.

Ramsfild tekez kir û got: "Eva pîrsgirêkek ji bo dewleta Îraqê, hêzên Hevalbend, civaka navneteweyî û aqibet pîrsgirêk ji bo Îranê ye".

Jêder: Malperên BBCpersian û Voanews